

Carta nu cuítí naçahyí Pablo nuú na cúu cuéntá Jesús ndúu ñuu Corinto

Cáhan Ndióxi Pablo xihín na cúu cuéntá Jesús ndúu ñuu Corinto

1 Yehe cúu Pablo, da naçaxi Ndióxi cacuu apóstol cuéntá Jesucristo jáchi já cúní a caja. Yehe xihín ñaní Sóstenes ²chíndahá nde Ndióxi coo ndó, na cúu cuéntá Jesús ndúu ñuu Corinto jan jáchi in cúu ndó xihín Jesucristo. Mé Ndióxi naçaxi a ndohó cacuu ndó ñayivi yíi, na nandiquiahva mé ná ndáha mé á. Ta quiahva já naçaxi ri a java ga na ndúu ndijáá ñuu cacuu na cuéntá mé á, na cája cáhnu Jesucristo, xitoho í jáchi cúu ri a xitoho mé ná. ³Ña cúní quéa ná caja Ndióxi, tátá yo xihín Jesucristo, xitoho í cuahá ñamaní xihín ndo ta ná caja mé á ña ná coo vaha ini ndó.

Ñamaní cája Ndióxi xoho sahá ña cándée iní Jesucristo

⁴Níi tiempo ndíquiahva i ndixahvi nu Ndióxi jáchi naçaja mé á cuahá ñamaní xihín ndo sahá ña cándée ini ndó Jesucristo. ⁵Ta sahá ña in nanduu ndó xihín mé á sahá ña cán quéa naçaja Ndióxi cuahá ñamaní xihín ndo já ná cuu cahan vaha ndó saha mé á. Ta já nasuná a xíní túní ndo já ná candaá vaha ini ndó saha mé á. ⁶Ta ña naçachi i xihín ndó sahá Jesucristo naxinu a ini ndó ta viti cája ndó ña cúní mé á caja ndó. ⁷Ta viti nani ndáti ndó quiví quixi tucu Jesucristo, xitoho í ñuyíví yóho ni in túhún toho ñaha a ndímaní nu ndo ña ná caja ndó ña cúní Ndióxi jáchi nasahan mé á tóco ndihi ñaha nu ndo. ⁸Mé Ndióxi chindeé a ndohó já ná caca tuun ndó íchi cuéntá mé á janda quiví nu ndíhi. Ta já ná a cúu chícaan ñayivi cuachi jata ndo tá ná xinu coo quiví quixi tucu Jesucristo, xitoho í ñuyíví yóho. ⁹Jáchi cája tá cája Ndióxi ña sahan mé á tühun a caja. Ta mé á quéa naçaxi a mí ña ná in cacuu xihín Jesucristo, xitoho í ña cúu in túhún jini já jahyi mé á.

Tává xoo java na cúu cuéntá Jesús mé ná

¹⁰Candehé ndo, ñani mí i, na cúu cuéntá Jesús. Xíca tahví i nu ndo xihín quiví Jesucristo, xitoho í ña ná ndique táhan víi tühun ndihi ndó ta a

cáhndá táhan ndó. Xíní ñúhú cuni táhan vaha ndó ta in túhún ñaha cañuhu ini ndó saha. Ta quiahva já ndítahan coo jiní ndihi ndó. ¹¹Candehé ndo, ñani mí i, na cúu cuéntá Jesús. Cáhan i ña yóho xihín ndo jáchi nacaxi tuhun na vehe Cloé xihín i ña ndaja mé ndó cáni táhan ndó. ¹²Jáchi nañehé e tuhun ña java ndó cáchí ndo ña cúu ndó cuéntá yehe, da cúu Pablo. Ta java ndó cáchí ndo ña cúu ndó cuéntá Apolos. Ta java ndó cáchí ndo cúu ndó cuéntá Pedro. Ta java ndó cáchí ndo cúu ndó cuéntá Jesucristo. ¹³Ta xihín ña yóho ña cája ndó quea sáhndá java táhan ndó. Candehé ndo. Coó naxihí i, da cúu Pablo ndica crúxu saha ndo já ná jácacu u ndohó. Ta ni coó nacandúta ndó cuéntá mí i. ¹⁴Ndixahvi Ndióxi coó najácandúta i ndohó. Jáchi ndájá ga ví cachi ndó cúu ndó cuéntá yehe tá ná jácandúta i ndohó, nduu. Joo da najácandúta i cúu Crispo xihín Gayo cuití va. ¹⁵Na cán quea ni in túhún ndó a cúu cachi ndó ña nacandúta ndó cuéntá mí i jáchi coó najácandúta toho i ndohó. ¹⁶Ta ndícuhun ini i ña najácandúta ri na vehe Estéfnas. Na yóho cuití cúu na ñúhu ini i najácandúta i. ¹⁷Jáchi coó nachindahá toho Jesucristo yehe ña ná caca nuu i jácandúta i ñayivi. Nachindahá mé á yehe ña ná caca nuu i cahan i tuhun vaha saha mé á xihín ñayivi já ná cuu cacu ndaa ínima ná. Ta coó toho tuhun ndíchí cáhan i xihín ná jáchi coo cúni jánuu ndáha i xihín tuhun cáhan i yóho tóco ndihi ña nacaja Jesucristo tá naxihí a ndica crúxu saha yo.

Ndíchí jiní Jesucristo ta íin ndée mé á quíxi nu Ndióxi

¹⁸Ñayivi, na xíca cuahan ndihi saha ná ini indayá, mé na cán cáhan na ña cúu yó na tachi tá cáhan yó ña naxihí Jesucristo ndica crúxu já ná cacu ndaa ínima ná. Joo nu mí, na nasacu ini Ndióxi jácacu a cávatá yo cándaa ini ña xihín ndée Ndióxi naxinu tuhun mé á nu yo. ¹⁹Já cáchí tuhun Ndióxi já:

Jándihi i sahá ña ndíchí jiní ñayivi ñuyíví,
ta a quehe e cuéntá sahá ña cándaa ini ñayivi, já nacahyi a nuú
tuhun Ndióxi.

²⁰Sahá ña cán quea coó saha toho ñaha ñuyíví yóho nu Ndióxi vatí da ndíchí jiní xihín da tácu ini cáhan da ña cúu dá da ndíchí ndivaha sahá ña xíní da cahan da sahá ñaha ñuyíví yóho. Joo nacaja Ndióxi ña ná cacuu a ña coó saha. ²¹Sahá ña ndíchí jiní Ndióxi, coo cúni mé á ña ná cuu cándaa ini ñayivi saha mé á xihín ña ndíchí quixi jiní ñayivi ñuyíví. Na nacaja mé á quea nachindahá a java ñayivi ña ná cahan na tuhun vaha saha mé á já quea ndá na cándusa ña ta cándee ini na Ndióxi já cuu cacu ndaa ínima ná. Ta ña yóho cúu á in ña tachi ndivaha nuú ñayivi ñuyíví.

²²Jáchi ñayivi Israel cáchí na ña ndúsa cuni na ña xitúhún ndivaha já cuu cándusa na tuhun vaha saha Jesús. Ta na tóho, na ñuu Grecia cúni na

ñā ná cāhan ndíchí ndivaha ñayivi xihín ná já cuu candúsa na ñā. ²³Joo mé nde xica nuu nde cáxi tuhun nde nuú ñayivi sahá Jesucristo, mé a naxihí ndica crúxu sahá ñayivi. Joo tá xíní johó na Israel ñā yóho já ndíhíhví na. Ta tá xíní johó na tóho ñā yóho já cāhán na ñā cúú á ñā tóntó ndivaha. ²⁴Joo tóco ndihi na nacaxi Ndióxi cacuu na cuéntá mé á, á cúú ná na tóho á cúú ná na Israel, cándaa ini na ñā cāhan nde sahá Jesucristo, ñā íin ndée mé á jácacu a ñayivi. Ta xíní vaha na ñā ndíchí ndivaha jini mé á nacaja Ndióxi. ²⁵Nuú ñayivi ñuyíví ñā cája Ndióxi cúú á ñā tóntó ndivaha. Joo ñā cája Ndióxi cúú á ñā ndíchí chága nu ndíhi ñaha cája ñayivi ñuyíví. Ta vatí cáchí ñayivi ñā co ndíyahví ñā naxihí Jesucristo ndica crúxu joo yahví chága ñā yóho a juú ga inga ñaha cuu caja ñayivi. ²⁶Candehé ndo, ñani i, na cúú cuéntá Jesús. Nacaxi Ndióxi ndohó cacuu ndó cuéntá mé á vatí chá cuití ndó cúú ndó na ndíchí jini nuú ñayivi ñuyíví. Ta chá ndó cúú ndó na náhnu nuú ñayivi ta chá cuití ndo cúú ndó na cuicá. ²⁷Joo nacaxi Ndióxi ñayivi, na cáchí ñayivi ñuyíví cúú ná na tóntó jini já queá ná cacahan nuú na ndíchí jini. Mé Ndióxi nacaxi a ñayivi vitá ná cacuu na cuéntá mé á já ná cacahan nuú na náhnu ndúu ñuyíví yóho. ²⁸Ñayivi, na coó saha ñuyíví yóho, na quéhe núu ñayivi saha, na cán cúú na nacaxi Ndióxi. Ta nacaxi a na co ndáyahví toho ñuyíví yóho ñā ná nuu ndáha na náhnu cuéntá ñuyíví yóho. ²⁹Ta xihín ñā yóho cándaa ini ñayivi ñā a cúu ndínehe jícó na mé ná nu Ndióxi. ³⁰Mé Ndióxi queá nacaja ñā ná in nduú xihín Jesucristo. Ta nacaja mé á ñā ná ndindíchí jini yo. Ta nacaja mé á ñā ná canduu ndaa yó nu Ndióxi. Nacaja mé á ñā ná nduú ñayivi yíi, na cúú cuéntá mé á. Ta mé á najácacu a mí nuú cuachí. ³¹Ta já cáchí tuhun Ndióxi já: “Ndá na cúní caja lándā, xíní ñúhú caja lándā na sahá ñā náhnu nacaja Ndióxi saha ná.”

Cáxi tuhun Pablo ñā naxihí Jesucristo ndica crúxu sahá cuachi ñayivi

2 Candehé ndó, ñani i, na cúú cuéntá Jesús. Tá nasahan i nacahan i ñā ndaa cuéntá Ndióxi nu ndo, coó nacahan i ñā xihín tuhun ndíchí ñuyíví yóho. ²Joo nasacu ini i cāhan i sahá Jesucristo cuití va tañu ndó, mé a naxihí ndica crúxu. ³Tá nasahíin i tañu ndó, coó nandiñehe jícó i mí i. Ñā nacaja i queá yíhví yíhví cúú u anda quíji ninu i. ⁴Ta tá nacasáhá i cáxi tuhun i tuhun vaha sahá Jesucristo nu ndo, coó toho tuhun ndíchí nacahan i xihín ndo ñā ná cava i jini ndó xihín á, vaha. Ñā nacaja i queá nacahan i xihín ndo xihín ndée ínima yíi Ndióxi ta mé a najáxinu a ini ndó xihín ndée mé á. ⁵Já queá ná cándaa ini ndó ñā Ndióxi queá cája ñā ná candee ini ndó mé á xihín ndée mé á. Ta co cúú á sahá ñā ndíchí quíxi jini ñayivi ñuyíví yóho.

**Ínima yíi Ndióxi cája ña ná candaa ini
ñayivi saha mé á**

⁶Joo tá ndítúhún nde xihín na sa cándaa vaha ini ñaha Ndióxi já cáhan nde tuhun ndíchí xihín ná. Joo co cáhan nde tátuhun cáhan taa ndíchí ndúu ñuyíví yóho. Ta ni co cúu á tátuhun ña cáhan da ndíchí, da cómí cuéntá sahá ñuyíví yóho. Jáchí yachí ndihi sahá na cán. ⁷Ña cáhan nde cúu á ña ndíchí cuéntá Ndióxi. Ta cúu á ña nasahin jehé, ña co xíní ñayivi saha janda tá cámaní cava sahá saha ñuyíví. Jáchí janda mé tiempo já nasacu ini Ndióxi ndá quiahva caja jácacu a mí anda ama cáa quívi. ⁸Ta ni in túhún na náhnu cómí cuéntá sahá ñuyíví yóho co cándaa ini na ña nasacu ini Ndióxi jácacu a mí. Jáchí tá ná candúsa na ña já quéa a cáta caa toho na Jesucristo, xitoho í ndíca cruxu, nduu. Jáchí mé Jesucristo cúu á ña cáhnu ndivaha. ⁹Ta já cáhí tuhun Ndióxi já:

Ni in túhún ñayivi a ñaha cuni na ta a ñaha cuni johó na,
ta ni a ñaha cahvi ini na,
ndá quiahva ín ña náhnu sácú ini Ndióxi quiahva nuú ñayivi tá
quíhvi ini na mé á, cáhí tuhun Ndióxi.

¹⁰Nacaja ínima yíi Ndióxi ña ná candaa iní tóco ndihi ña yóho. Jáchí ínima yíi mé á sándehe a tóco ndihi ñaha ta xíní a janda ña cáhvi ini mé Ndióxi.

¹¹Ni in túhún ñayivi co xíní na ña cáhvi ini inga na. Ínima in in na cuítí va xíní a ña cáhvi ini in in na. Quiahva já ín ri xihín Ndióxi va. In túhún ínima yíi mé á xíní ndíá cáhvi ini a. ¹²Nasahan Ndióxi ínima yíi mé á nu yo ta co cúu á tátuhun ínima ñayivi ñuyíví. Ta nacaja mé á ña ná candaa iní ndaja ín ña náhnu sahan mé á nu yo. ¹³Ta tá cáhan nde sahá ña yóho, cáhan nde tá quiahva najánaha ínima yíi Ndióxi nuú nde. Ta co cáhan nde ña xihín tuhun ndíchí nacatiahva nde ñuyíví yóho. Quiahva já ndícani nde ñaha Ndióxi xihín na ñúhu ínima yíi Ndióxi ini.

¹⁴Tóco ndihi ña yóho cúu á ña tóntó ndivaha nuú ñayivi, na co ñúhu ínima yíi Ndióxi ini. Co ndíquehe vaha na ña ta ni a cúu candaa ini na ndaja ín a jáchí na ñúhu ínima yíi Ndióxi ini, na cán cúu ndusa na cándaa ini ñaha Ndióxi. ¹⁵Joo na ñúhu ínima yíi Ndióxi ini, na cán cúu na cándaa ini ndá ñaha cúu ña vaha ta ndá ñaha co cúu toho ña vaha. Ta xihín ña yóho cátóntó ñayivi ñuyíví jáchí co cándaa ini na ña cúu cuéntá Ndióxi. ¹⁶Jáchí cáhí tuhun Ndióxi: “Ni in túhún ñayivi a cúu candaa ini na ña cáhvi ini Ndióxi, xitoho í. Ta ni in túhún na a cúu cachi xihín mé á ña ndítahan nu á caja”, cáhí tuhun Ndióxi. Joo mí, na cúu cuéntá Jesús, cáhvi iní tá quiahva cáhvi ini Jesucristo jáchí ñúhu ínima yíi Ndióxi ini mí, na cúu cuéntá mé á.

Nā cája chúun cuéntá Ndióxi

3 Candehé ndó, ñani i, na cúu cuéntá Jesús. Coó nacuu cahan i xihin ndo tá quiahva cahan i xihin na nachutú ndaa xihin ínima yii Ndióxi. Jáchí mé ndó cúu ndó tátuhun lée loho ña chíchí jáchí a ñaha cuahnu ndó xihin tuhun Ndióxi jáchí cája ndó ña xica ini yiquí cuñu ndó caja tá quiahva cája ñayivi ñuyívi. ²Sahá ña cán quéa tá najánaha i tuhun Ndióxi nu ndo, coó nacuu jánaha i ña ihvi chága nu ndo jáchí a cúu canda ini ndó ña. Ña nacaja i xihin ndo quéa nasahan i tátuhun leche nu ndo jáchí cúu ndó tátuhun na valí chíchí sahá ña a cúu cuxu ndó ñaha ve. Ta janda viti co ín tiahva ndó jácuaha ndó ña ihvi chága cuéntá tuhun Ndióxi. ³Jáchí cúu yii va ndó tátuhun ñayivi ñuyívi. Ndaja táhan mé ndó cáhivi ini xihin táhan ndó ta cáni táhan ndó ta sáhdá java táhan ndó. Ta xihin ña yóho cája ndó ña cúní mé cuití ndo tá quiahva cája ñayivi ñuyívi. ⁴Java ndó cáhí ndo ña cúu ndó cuéntá yehe, da cúu Pablo. Ta java ndó cáhí ndo ña cúu ndó cuéntá Apolos. Ta xihin ña yóho sáhdá java táhan ndó ta náha ndó ña cája ndó tá quiahva cája ñayivi ñuyívi.

⁵Ndá da cúu Apolos xihin yehe ña ná cani táhan ndó sahá nde. Co ndítahan caja ndó já jáchí mé nde cúu nde da xica nuu cája chúun cuéntá Jesucristo, xitoho í cuití va. Ta sahá chuun cája nde yóho nacuu nacandúsa ndó mé á. Ta ña yóho cúu chuun nanaha Jesucristo, xitoho í nuú yehe xihin nu Apolos caja nde. ⁶Ña nacaja nde cúu á tátuhun ña cája na tá xútu na. Ta yehe cúu u tátuhun da nachihin tata jáchí nacaxi tuhun i tuhun Ndióxi nu ndo. Ta Apolos cúu dá tátuhun da naxojo ticuí nuú a cán jáchí najánaha chága da tuhun Ndióxi nu ndo. Joo Ndióxi quéa nacaja ña ná cuahnu a jáchí cája mé á ña ná cuu cuahnu ndó xihin tuhun mé á. ⁷Sahá ña cán quéa vatí yehe cúu u da naxutu ta Apolos cúu dá da naxojo ticuí joo ni in túhún nde coó saha. Cáhnu cúu Ndióxi jáchí mé á quéa nacaja ña ná cuahnu mé tata naxutu nde cán. ⁸Xíní ñúhú canda ini ndó ña in cúu va na chíhin tata xihin na xójo ticuí nu á. Ta tá in tá in chuun nacaja in in na cán quehe na yahvi saha. ⁹Yehe xihin Apolos in cúu nde cája chúun nde cuéntá Ndióxi. Ta mé ndó cúu ndó tátuhun in yójo nuú nasacu Ndióxi ndehe caja chúun nde cuéntá mé á.

Ta jári cúu ndó tátuhun in vehe ña cávaha Ndióxi. ¹⁰Ta yehe cúu u tátuhun da cávaha mé vehe yóho. Ta mé Ndióxi quéa nasahan ñamaní nuú i ña ná taán i yuu ndúhu sahá ta ná jácava sáhá i ña. Ta inga na xíní ñúhú caja chúun xihin á. Joo ndítahan candehé vaha na ndaja caja na chuun yóho. ¹¹Jáchí in túhún Jesucristo cúu á tátuhun yuu ndúhu sahá vehe yóho. Ta ni in na a cúu tavá xóo na ña ta já cacu na inga ñaha. ¹²Mé na cávaha vehe nuú yuu ndúhu yóho cuu jáxinu na ña xihin jiuhun cuáan ta

cuu caja na ña xihín jiihun cúxú ta cuu caja ri na ña xihín yuu ñúchí. Ta jári cuu caja na ña xihín yító ta cuu caja ri na ña xihín xehe ndíyoho ta janda xihín toñámá cuu caja na ña. ¹³Joo vaxi quivi quixi tucu Jesucristo coto ndojó mé á chuun nacaja in in ñayivi cuéntá mé á. Cacuu a tátuhun coto ndojó a ña xihín ñuhú cáyi já queá ná ñaha nu á, á ndihi sahá, á co ndíhi sahá. Ta xihín ña yóho ñaha nu á, á vaha nacaja chúun ñayivi cuéntá mé á, á a váha toho nacaja na. ¹⁴Ta tá coó nandíhi sahá ña nacaja na cán já queá chahvi Ndióxi na sahá chuun nacaja na. ¹⁵Joo tá ná cáyi ña nacavaha na cán já ndihi saha tóco ndihi chuun nacaja na vatí mé ná cacu ndaa ínima ná. Ta ña yóho cacuu a tátuhun tá jácacu in dataa mé dá tá quéta da ini in vehe tá cáyi a xihín ñúhu ita.

¹⁶Á co xini ndó ña cúu ndó tátuhun veñuhu Ndióxi tá ndácaan ínima yii mé á ini ínima in in ndó. ¹⁷Ta ndá na ná jándíhi na sahá veñuhu Ndióxi yóho já queá jándíhi Ndióxi sahá na cán. Jáchi yii ndivaha veñuhu Ndióxi. Ta mé ndó cúu ndó tátuhun veñuhu Ndióxi cáhan i saha jan.

¹⁸Candehé ndo. Ndá ndó cáhan ña cúu ndó na ndíchí jini sahá ña xini ndó ñaha ñuyívi yóho, xini ñuhú canda ini ndó ña cúu á tátuhun jándahvi ndó mé ndó. Xini ñuhú ndaja ndó mé ndó tátuhun na co xini já queá ná nuna nu Ndióxi jáñaha nu ndo ndaa cúu ndusa na ndíchí jini. ¹⁹Jáchi ña ndíchí quíxi jini ñayivi ñuyívi cúu á ña tóntó ndivaha nu Ndióxi. Já cáchi tuhun Ndióxi já: “Ña cája mé á queá ná cachihin saha ná xihín ña ndíchí quíxi jini mé va na.” ²⁰Quiahva já cáchi ri tuhun Ndióxi: “Cánda cáxi ini Ndióxi ña coó sahá ña cáhvi jini na ndíchí ndúu ñuyívi yóho”, já cáchi tuhun Ndióxi. ²¹Sahá ña cán queá ni in túhún ñayivi co ndítahan ndínehe jícó na mé ná sahá ña tiaha in ñayivi ñuyívi yóho cája na. Xini ñuhú ndicuhun ini ndó ña nasahan Ndióxi tóco ndihi ñaha nu ndo.

²²Nandiquiahva mé á ndehe, da cúu Pablo xihín Apolos xihín Pedro nu mé ndó já ná cuu jáñaha nde tuhun Ndióxi nu ndo. Nasahan mé á ñuyívi yóho nu ndo já ná cuu catacu ndó. Ta nasacu ini mé á quívi quivi ndó ta já tandaa quívi cuhun ndó coo ndó xihín mé á. Tóco ndihi ña yóho nasahan Ndióxi nu ndo. ²³Ta mé ndó cúu ndó cuéntá Jesucristo ta Jesucristo cúu á cuéntá Ndióxi.

Ndícani Pablo ndaja iin chuun cája na apóstol

4 Co ndítahan toho ndaja cáhnu ndó ndehe. Xini ñuhú quehe ndó cuéntá ña natahnda chuun nuú nde caja chúun nde cuéntá Jesucristo jáñaha nde ña coó nasaxini ñayivi jihna, ña nasacu ini Ndióxi caja. ²Ta ndá da ndíquehe in chuun, xini ñuhú ñaha da ña mé a ndaa cuu candeé ini na da, ña mé a ndaa caja tá caja da chuun natahnda nu dá caja da. ³Ta cája i cuéntá nacaja vaha i chuun nasahnda Ndióxi nuú i caja i. Sahá ña cán queá

co sáhní toho i mí i tá chícaan ndó cuachi jatá i. Ta co ndícani ini i tá java ga ñayivi chícaan na cuachi jatá i. Jáchí cája i cuénta co toho cuachi nacaja i. ⁴Tá ná cachi i xihín ndo ña coó toho cuachi nacaja i, co cúní cachi i ña mé a ndaa co ndójo ga i cuachi. Jáchí xíní vaha Jesucristo, xitoho i á nacaja vaha i á coó nacaja vaha i. ⁵Sahá ña cán quea co xíní ñúhú ndíhi ini ndó candehé ndaa ndó ñayivi. Xíní ñúhú candati ndó janda quiahva ná quixi Jesucristo caja víí mé á sahá ñayivi já ná nditívi ña ñúhu ínima in in ñayivi. Ta xihín ña yóho cuni tóco ndíhi ñayivi ña cáhvi ini na. Anda jáví ndaja cáhnu Ndióxi na nacaja vaha.

⁶Candehé ndo ñani i, na cúú cuénta Jesús. Sahá ña cúní nde ña ná candaa ini ndó ndía ndítahan caja ndo sahá ña cán quea ndícani i nu ndo saha Apolos xihín saha mí i. Jáchí íin in tühun ta cáhí a ña co ndítahan nu ndó caja cáhnu ndó in ñayivi nani quehe núu ndó inga na. Ta xihín ña yóho cuu candaa ini ndó ña co ndítahan ndínehe jícó ndo mé ndó sahá ña cúú ndó cuénta in da jáchí xihín ña yóho jánuu ndáha ndó inga na táhan nde. ⁷Jáchí ni in ndó co cúú ndó na náhnu chága a juú ga inga na. Xíní ñúhú candaa ini ndó ña tóco ndíhi ña cómí ndo cúú á ña nasahan Ndióxi nu ndo. Sahá ña cán quea co ndítahan caja cáhnu ndó mé ndó sahá ña nañehe táhvi ndo nu Ndióxi.

⁸Cáhán ndo ña ni in ñaha co ndímaní nu ndo joo co cúú á ña ndaa. Cáhán ndo ña cúú ndó na cuicá joo co cúú á ña ndaa. Ta cáhán ndo cúú ndó na cómí cuénta sahá ñayivi joo co cúú á ña ndaa. Cája ndó tátuhun co xíní ñúhú toho ndó ndehe. Vá ná cacomí ndusa ndó cuénta sahá ñayivi já ná cacomí ri ndehe va cuénta saha ná xihín ndo. ⁹Cúú á tátuhun nasacu Ndióxi ndehe, na cúú apóstol janda nu ndíhí. Cúú nde tátuhun na ndícuíta yíco cühun quivi. Ta janda johó sándehe ñayivi ñuyíví ndehe ta sácu ndaa na ndehe. Ta janda mé táto Ndióxi sándehe na ndehe cuahan nde. ¹⁰Sahá ña quíhvi ini nde Jesucristo cúú nde tátuhun ñayivi tóntó ndivaha nuú ñayivi ñuyíví. Joo mé ndó nandaja ndó mé ndó tátuhun na xíní ndivaha saha mé á. Mé nde cúú nde tátuhun ñayivi vitá nuú ñayivi ñuyíví joo cája ndó tátuhun na ndacú ini. Ndája cáhnu ñayivi ñuyíví mé ndó nani quehe núu na ndehe. ¹¹Ta janda viti ndóho tá ndóho ini nde. Java tañu coó ña cuxu nde ta coó ticuí coho nde ta ni jáhma candixi nde coó. Ta janda johó cája xíxi ñayivi xihín nde. Ta ni vehe nde coó. ¹²Ta a juú quiahva ndúcú ndéé nde cája chúun nde catacu nde. Ta tá chícaan ñayivi cuachi jatá nde já xíca tahví nde nu Ndióxi ña ná caja mé á ñamani xihín ná. Ta cája ndeé ini nde tá cája xíxi na xihín nde. ¹³Ta vitá cáhan nde tá ndúcú ñehe nde tühun nuú ñayivi vatí cáhan núu na sahá nde. Mé nde cúú nde tátuhun xehe nuú ñayivi ñuyíví. Ta cája na xihín nde tá quiahva cája na xihín ñaha

coó saha, ña nacandoo cūhun cuita. Ta quiahva já cāja na xihín nde janda viti.

¹⁴Xíní ñúhú candaa ini ndó ña co cáhyí i ña yóho nu ndo sahá ña cúní jácacahan i nuu ndo. Cáhyí i ña nu ndo jáchi cúu ndó tátuhun jahyi i. Ta jánaha i ña nu ndo tá quiahva cāja in dataa xihín jahyi da jáchi quíhvi ini i ndohó. ¹⁵Jáchi vatí ná coo uxu mil ñayivi jánaha na ndohó sahá Jesucristo joo in túhún yehe cúu tátuhun tátá ndo. Jáchi yehe cúu u da nacahan tuhun vaha sahá Jesucristo nu ndó nu cuítí ta já nacandee ini ndó mé á.

¹⁶Sahá ña cán quea xíca tahví i nu ndó ña ná cāja ndó tá quiahva cāja i.

¹⁷Sahá ña cán quea chindahá i Timoteo nu ndo jáchi cúu dá tátuhun jahyi maní i ta cāja chúun da cuéntá Jesucristo, xitoho í xihín ndinuhu ini da. Ta jándicuhun ini da ndohó ndá quiahva cāja i tañu na cúu cuéntá Jesús ta ndá quiahva jánaha i nu ná ndijáá veñuhu nu xíca i cuahan i.

¹⁸Java ndó nacasáhá ndo cāja lándá ndó jáchi cáhán ndo ña a saa ga i coto nihni i ndohó. ¹⁹Joo yachi saa i coto nihni i ndohó tá cúní Ndióxi. Anda já candehé e, á mé a ndaa íin ndée Ndióxi ini na xíca cāja lándá jan á yúhu uun na cahan na. ²⁰Tá mé a ndaa cómí Ndióxi cuéntá sahá in ñayivi já quea íin ndée mé á ini na cāja na ña cúní mé á. Ta coó saha toho a á tiahva ndivaha na cahan na. ²¹Ta viti cachi ndó xihín i ndía quea catóó chága ndo. Á catóó chága ndo ña ná saa i jánani i ndohó sahá ña cāja ndó ña núu. Á catóó chága ndó ña ná saa i ta víí víí cahan i xihín ndo jáchi najándacoo ndó ña núu cāja ndó. Ndía cúní ndó.

Cáhan Pablo sahá in da íin xihín náná queén da

5 Sa nañehé e tuhun ña íin in da cúu cuéntá Jesús tañu ndó jan ta íin da xihín náná queén da. Ta ña yóho cúu á in cuachi cáhnu ndivaha. Ta ni ñayivi ñuyiví co cāja ña yóho. ²Ta vatí íin cuachi cáhnu yóho tañu ndó joo cáa ga ri ndóhó cāja cáhnu ndó mé ndó. Xíní ñúhú cacuéha ini ndó sahá ña yóho. Ta xíní ñúhú tavá ndó da cāja cuachi yóho tañu ndó jan. ³Vatí co íin i xihín ndo jan joo ndícani ndivaha ini i sahá ña cúu jan. Ta cúu á tátuhun íin i xihín ndó jan ña cán quea sa nasacu ini i ña xíní ñúhú cāja ndó xihín da cāja cuachi jan. ⁴Játaca táhan ndihi ndó na cúu cuéntá Jesucristo, xitoho í. Ta mé a cán quiahva ndée á nu ndo cāja ndó ña cúní mé á. Ta cacuu a tátuhun coo i xihín ndó jan. ⁵Anda já xíní ñúhú ndiquiahva ndó da jan ndáha tiñáhá sacuahá já ná jándoho rí ini yiquí cuñu da viti ta já ná cuu cacu ndaa ínima dá tá ná xinu coo quiví quixi tucu Jesucristo.

⁶Co ndítahan cāja lándá ndo sahá ña cāja ndó. Xíní ñúhú ndicuhun ini ndó in tuhun ña cáhí já: “Chá cuítí yúsa naxaa játiví ndihi a java yúsa ña íin vaha.” ⁷Xíní ñúhú tavá ndo da jan tañu ndó jáchi cúu dá tátuhun yusá naxaa, ña játiví ña íin vaha. Ta xihín ña yóho quee ña núu veñuhu nu táca

ndó jan jáchi sahá da jan cuu caquini inga na ta caja na cuachi. Xíní ñúhú canduu vií ndó tátuhun mé pan xíxi na vicó pascua jáchi coó yusá naxaa ñúhu xihín á. Ta Jesucristo nasacuu a tátuhun in ndicachi, rí najoco na nu Ndióxi vicó pascua sahá cuachi ñayivi jáchi naxihí a ndica crúxu sahá cuachí já ná cuu cacu ndaa ínima yo. ⁸Sahá ña cán quea ndítahan caji iní sahá ña nacaja Jesucristo. Xíní ñúhú jándacoo í ña núu sa nacaja í jihna, ña cúu tátuhun pan naxaa. Ta xíní ñúhú caja í ña ndaa xihín ndinuhu iní. Ta ña yóho cúu á tátuhun pan ña coó nacava táhan yusá naxaa xihín.

⁹Nu carta nachindahá i nu ndó jihna ga, nacachi i xihín ndó ña ná a catáhan ndó xihín ñayivi, na ndúu xihín na co cúu yíi ná á ñájíhí na. ¹⁰Tá nacachi i ña yóho xihín ndó co cúni cachi a ña xíní ñúhú tavá xóo ndó mé ndó chí in ndeé nuú ñayivi ñuyíví yóho jáchi a cuú quee ndó ñuyíví yóho cuhun ndó. Ta mé a ndaa ndúu cuahá na ñuyíví yóho cája na cuahá cuachi xihín yiquí cuñu na ta catóo ndivaha na jiuñun ta cája cuíhná na ta cája cáhnu na yoco. ¹¹Ña cúni cachi i xihín ndó quea co ndítahan catáhan ndó xihín na cáchi cúu cuéntá Jesús nani cája na ña núu xihín yiquí cuñu na, á tá cúu ná na catóo ndivaha jiuñun, á tá cúu ná na cája cáhnu yoco, á tá cúu ná na tuhún, á tá cúu ná na xíhi, á tá cúu ná na cuihná. Ta ni a cácoo ndó cuxu ndó xihín ná tá cája na ña yóho. ¹²Co cáhan i sahá ñayivi ñuyíví jáchi co ndítahan nuú i caja vií i saha ná. Joo ndítahan nu ndó candehé ndó ndaja cája na cúu cuéntá Jesús ndúu tañu ndó jan. ¹³Jáchi mé Ndióxi quea caja vií a sahá cuachi ñayivi ñuyíví. Ña cán quea ndítahan nu ndó tavá ndó da cája cuachi tañu ndó jan.

Tá sácú saha táhan na cúu cuéntá Jesús nuú na jutixia

6 Táco táhan ini ndó xihín ña cája ñani ndó, na cúu cuéntá Jesús co ndítahan nu ndó cuhun ndó cacu ndó saha ná nuú na jutixia, na co cúu cuéntá Jesús. Ña ndítahan caja ndó quea cáhan ndó xihín mé na cúu cuéntá Jesús ña ná caja vií na sahá ña co táhan ini ndó xihín jan. ²Á co xíní ndó tandaa quívi caja vií na cúu cuéntá Jesús saha tóco ndihi ñayivi ñuyíví. Ta tá mé ndó cacuu ndó na caja vií saha tóco ndihi ñayivi ñuyíví, ndá cuéntá quea co cúni ndó caja vií ndó sahá ña válí cúu tañu mé ndó jan. ³Ña xíní ñúhú caja ndó quea nducú ndó caja vií ndó sahá ña cúu tañu ndó jan. Jáchi xíní ñúhú ndicuhun ini ndó ña janda táto Ndióxi caja vií yo saha. ⁴Sahá ña cán quea tá cáni táhan ndó sahá ñaha válí ñuyíví yóho co xíní ñúhú toho cuhun ndó cavií saha ndó nuú na co cúu cuéntá Jesús. ⁵Candehé ndó. Cáhan i ña yóho xihín ndó já ná cacahan nuu ndó. Á co íin in da tácu ini tañu ndó jan ña ná caja vií da saha ndó, vaha. Xíní ñúhú ndindita in da tácu ini já ná cuu caja vií da sahá ña cúu tañu ndó jan. ⁶Joo ña cája ndó quea cáni táhan ndaja táhan mé ndó ta já ndáca táhan ndó

cuahān ndó cavií saha ndó nuú na co cúu cuéntá Jesús. Co ndítahan toho caja ndó já.

⁷Sa cuachi cáhnu ndivaha quéa cája ndó tá cáni táhan ndaja táhan mé ndó jan. Vaha ná caja ndeé ini ndó tá co cája vaha in na xihín ndo. Vaha ná caja ndeé ini ndó tá ná caja cuíhná na ñaha ndó. Jáchi co ndítahan cacu saha táhan ndó nuú na co cúu cuéntá Jesús. ⁸Joo ña cája ndó quéa ña núu xihín ñani táhan ndó ta janda cája cuíhná ndo ñaha ñani ndó, na cúu cuéntá Jesús.

⁹Xíní ñúhú candaa ini ndó ña coó saha toho ñayivi cája ña núu jan cuhun na nuú cacomí Ndióxi cuéntá saha ná. A jándahvi ndó mé ndó jáchi na ndúu xihín na co cúu yíí ná á ñájíhí na a cuhun toho na nuú cacomí Ndióxi cuéntá saha ná. Ta ni na cája cáhnu yoco ni na ndúu xihín yíí á ñájíhí inga na ta ni da cúu taa líhi a cuhun toho na nu Ndióxi. ¹⁰Ta ni na cuíhná ta ni na cátoó ndivaha jiuuhún ta ni na xihí ta ni na ndahnda yúhu ta ni na jándahvi ñahá ta ni in táhan na yóho a cuhun toho na nuú cacomí Ndióxi cuéntá saha ná. ¹¹Ta táhan na yóho nasacuu ri java ndóhó va, nduu. Joo viti sa nandaja vií Ndióxi ndohó ta nacaxi a ndohó cacuu ndó cuéntá mé á. Nanduu ndó ñayivi ndaa nu Ndióxi sahá ña nacaja Jesucristo, xitoho í ta sahá ña cája ínima yíi Ndióxi.

Xíní ñúhú candaa í yiquí cuñu í jáchi cúu á ña yíi

¹²Ndúu java ñayivi ta cáchí na ña núná nu ná caja na ña cúni mé va na. Vatí mé a ndaa núná nu ná caja na ña cúni mé ná joo xíní ñúhú candehé na á vaha, á a váha ña cája na. Jáchi mé a ndaa núná nu yo caja í ña cúni mí joo co ndítahan quiahva í ñamāni ña ná cahnu ña núu yiquí cuñu í.

¹³Ta cáchí na ña íin tixi yó sahá ña cán quéa xíní ñúhú cuxú. Ta cáchí na ña xíní ñúhú cuxú jáchi íin tixí. Joo vaxi quívi jándihi Ndióxi saha ndíví ña yóho. Ta coó nasahan Ndióxi yiquí cuñu í nu yo ña ná caja í cuachi xihín á tátuhun ña ná coo í xihín na co cúu ñájíhí yo á yíí yo. Nasahan Ndióxi yiquí cuñu í nu yo já ná caja í ña cúni mé á. Ta nacaja mé á ña ná cacomí a cuéntá saha yo. ¹⁴Ta tá quiahva nacaja Ndióxi najánditacu a Jesucristo, xitoho í quiahva já caja ri a jánditacu a yiquí cuñu í xihín ndée mé á.

¹⁵Xíní ñúhú candaa ini ndó ña in cúu ndó xihín Jesucristo. Ta tá cuahān ndó cája ndó cuachi xihín najihí xíca jii, cúu á tátuhun ñéhe ndó Jesucristo cuahān cája ña núu. Co ndítahan caja ndó já. ¹⁶Sa xíní vaha ndó ña tá quíhvi nuu in dataa xihín najihí xíca jii já quéa ndúu na tátuhun in víxí ñayivi. Jáchi cáchí tuhun Ndióxi já: “Tá ná ndique táhan in dataa xihín in ñáñáha já quéa ndúu na tátuhun in víxí ñayivi.” ¹⁷Ndá na ndiquiahva mé ndáha Jesucristo, xitoho í já quéa in ndúu na xihín mé á jáchi ñúhu ínima yíi Ndióxi ini na.

¹⁸Cama caxoo ndó nū tóco ndihi ña núu xíca ini yiquí cuñu ndó caja. Co ndítahan coo ndó xihín na co cúu ñájíhí ndo á yíi ndo jáchi ni in túhún toho cuachi co cája quini nahá xihín yiquí cuñu ñayivi tátuhun cuachi yóho. Jáchi ndá na iin xihín na co cúu yíi ná á ñájíhí na já quéa cája na cuachi nuú yiquí cuñu mé va na. ¹⁹Xíní núhú ndicuhun ini ndó ña mé yiquí cuñu ndó jan cúu á tátuhun in veñuhu nū ndácaan ínima yíi Ndióxi, mé a nasahan Ndióxi nū ndo. Ta viti yiquí cuñu ndó a juú ñaha mé ndó cúu á jáchi cúu á ñaha Ndióxi. ²⁰Jáchi yahvi ndivaha nachahvi Ndióxi saha ndo tá naxihí Jesucristo ndica crúxu. Saha ña cán quéa ndítahan caja cáhnu ndó Ndióxi xihín yiquí cuñu ndó ta jári xihín ínima ndo jáchi ndívi a cúu á cuénta Ndióxi.

Tá tándaha ñayivi

7 Ta viti cúní nducú ñehé e tuhun nū ndo sahá ña nandaca tuhún ndó yehe nū carta nachindahá ndó nuú i. Cáchi i xihín ndó sahá da cámani tandaha ña vaha cája da tá ná coo tacú da. ²Joo sahá cuachi cája ñayivi tá ndúu na xihín na co cúu ñájíhí na á yíi ná sahá ña cán quéa vaha chága ná tandaha ná já ná coo ñájíhí in in taa ta jári najihí va ná coo yíi in in na. ³Ta in dataa ndítahan ndiquiahva da mé dá nū ñájíhí da ta jári ñáñáha ndítahan ndiquiahva ña mé ña nū yíi ña jáchi quiahva já sáhdá a coo a. ⁴Jáchi in ñáñáha, ña natandaha co cómi ga ña cuénta saha mé ña jáchi yíi ña cúu da cómi cuénta saha yiquí cuñu ña. Ta ni in dataa, da natandaha co cómi ga da cuénta sahá yiquí cuñu da. Ñájíhí da cúu ña cómi cuénta sahá yiquí cuñu da. ⁵Sahá ña cán quéa ndítahan ndiquiahva nū táhan ndó ta a cándají táhan ndó. Ta tá co cúní ndó cuju xitáhan ndó xíní núhú cacuu a sahá ña sa najándique táhan tuhun ndó ña a cúju xitáhan ndo sahá ña cúní ndó caca táhvi ndó nū Ndióxi chá tiempo. Joo tá nandihi xíní núhú ndique táhan tucu ndó jáchi tiáhva náa jácahan Satanás, mé tiñáha sacuahá ndohó ña ná caja ndó cuachi sahá ña a cuú cahnu ndó nuú ña xíca ini yiquí cuñu ndó caja.

⁶Tóco ndihi ña cáhan i xihín ndo yóho co cúní cachi a ña xíní núhú tándaha ndo vatí cuu tandaha ndo tá cúní ndo. ⁷Vatí mé a ndaa cájii íní i tá ná canduu tacú ndihi ndó tátuhun yehe. Joo sa jíin sa jíin nacaja Ndióxi xihín in in í. Java na ñéhe táhvi ná tandaha na ta java na ñéhe táhvi na canduu tacú na.

⁸Ndá na ndúu tacú xihín ndá na ndúu cuáan, ña vaha chága quéa ná a tándaha ná ta ná canduu na tátuhun yehe. ⁹Joo tá co ndeé ini na cahnu na yiquí cuñu na, vaha chága ná tandaha ná jáchi vaha chága ná tandaha ñayivi a juú ga ña ná ndiava íní na coo na xihín na co cúu yíi ná á ñájíhí na.

¹⁰Ta nu ndóhó, na sa íin yíi á ñájíhí, sáhndá i chuun nu ndó ña ná a jándacoo táhan ndó. Ta ña sáhndá i nu ndo yóho co cúu á ña naquixi jini mí i. Cúu á ña sáhndá Ndióxi caja ndó. Co ndítahan nuú in ñáñáha jándacoo ña yíi ña. ¹¹Ta tá ná jándacoo ña da, co ndítahan nu ña tandaha ña xihín inga da. Á tá coó ta ña ndítahan caja ña quéa ndique táhan maní tucu ña xihín yíi ña. Ta jári in dataa co ndítahan nu dá jándacoo da ñájíhí da.

¹²Íin java ga ñaha cúni cahan i xihín ndo. Mí i cáhán i ña vaha caja ndó ña vatí mé a ndaa co cúu á ña nasahnda Ndióxi nuú i jánaha i nu ndo. Ta ña yóho quéa ña cahan xihín ndo: Tá íin in da cúu cuéntá Jesús ta íin ñájíhí da, ña co cúu cuéntá Jesús. Ta tá cájii ini ña coo ña xihín dá já quéa co ndítahan nu dá jándacoo da ña. ¹³Ta tá íin in ña cúu cuéntá Jesús ta íin yíi ña, da co cúu cuéntá Jesús. Ta tá cájii ini da coo da xihín ña já quéa co ndítahan jándacoo ña da. ¹⁴Jáchí caja yíi Ndióxi in dataa sahá ña íin da xihín ñájíhí da, ña cúu cuéntá Jesús. Ta jári caja yíi Ndióxi in ñáñáha sahá ña íin ña xihín yíi ña, da cúu cuéntá Jesús. Jári caja yíi Ndióxi jahyi na yóho ná a cácuu na tátuhun na co xini Ndióxi. Ta xihín ña yóho cuu candaa ini na ndaja íin íchi cuéntá Jesús. ¹⁵Joo tá cúni yíi ndo á ñájíhí ndo, na co cúu cuéntá Jesús jan, quee na cuhun na já quéa quiahva ndó ñamaní nu ná caja na ña. Jáchí co ndítahan nu ndó caja ndúsa ndó xihín na co xini Ndióxi cán ña ná coo na xihín ndo. Jáchí cúni Ndióxi ña ná canduu vií ndo. ¹⁶Ta ni co xini ndo á ndiquehe yíi ndó á ñájíhí ndo íchi cuéntá Jesús, á a ndiquehe na ña.

¹⁷Ta cáxi tuhun i nu tóco ndihi na cúu cuéntá Jesús ndúu ndijáá veñuhu ña ndítahan coo na tá quiahva nasahin na tá nandihvi na íchi cuéntá Jesús jáchi quiahva já cúni Ndióxi. ¹⁸Ta tá naquihvi ndó íchi cuéntá Jesús ta sa ndácaan marca yiquí cuñu ndó coó caja toho a. Joo tá coó marca jan yiquí cuñu ndó co ndítahan chícáan ndó ña yiquí cuñu ndó. ¹⁹Jáchí coó caja toho a á íin marca yiquí cuñu ndó á coó a. Ña cúni Ndióxi quéa ná caja ndó ña sáhndá mé á nu ndo caja ndó xihín ndinuhu ini ndó. ²⁰Ta ndítahan coo ndó tá quiahva nasahin ndó tá nandiquehe ndó íchi cuéntá Jesús. ²¹Ta tá nasacuu ndó na naxeen xitoho ndó caja chúun ndó tá nandiquehe ndó íchi cuéntá Jesús já quéa co ndítahan ndicani ini ndó sahá. Joo tá ná quiahva xitoho ndó íchi nu ndó ña ná quee ndó cuhun ndo já quéa caja ndó ña. ²²Jáchí da cúu cuéntá Jesús cúu dá da najaní Ndióxi nuú cuachi da vatí cándoo da caja chúun da cuéntá xitoho da, da naxeen ñahá. Ta da naxica núná mé tá nandiquehe da íchi cuéntá Jesús cúu dá mozo cuéntá Jesucristo. ²³Jáchí yahvi ndivaha nachahvi Ndióxi saha ndo tá naxihí Jesucristo ndica crúxu ña ná cacomí a cuéntá saha ndo. Sahá ña cán quéa a ndíquiahva toho ndó mé ndó ndáha ñayivi ña ná cahnu na ndohó.

²⁴Candehé ndo ñani mí i, na cúu cuéntá Jesús. Ndítahan coo ndó tá quiahva nasahiin ndó tá nacana Ndióxi ndohó cacuu ndó cuéntá mé á jáchi iin mé á xihin ndo.

²⁵Ta viti cúni cahan i sahá na tacú, na cámani tandaha. Coó nacachi toho Ndióxi xihin i sahá ña yóho ña cán quea cahan i ña cáhvi ini mí i sahá. Ta cuu candúsa ndó ña cahan i xihin ndo jáchi nacaja Ndióxi ñamani xihin i ña cúu u in da tácu ini. ²⁶Ta cáhán i ña ndítahan coo tacú in dataa jáchi ihvi ndivaha cáa tiempo ndúu viti. ²⁷Joo tá iin ñájíhí ndo, a jándacoo ndó ña. Ta tá coó ñájíhí ndo, a ndúcú ndó ña. ²⁸Joo a juú cuachi quea cája ndó tá ná tandaha ndo. Ta ni a juú cuachi quea cája in ña tacú tá ná tandaha ña. Joo mé a ndaa ná cahan i xihin ndo, yáncá a tá ná tandaha ñayivi jáchi cuahá ndivaha ndoho ini na. Ta co cúni ña ná ndoho ini ndó já sahá ña cán quea cahan i ña yóho xihin ndo.

²⁹Candehé ndo ñani i, na cúu cuéntá Jesús. Ña cúni cachi i cúu ña yóho: Sa nacayati tiempo quixi Jesucristo. Sahá ña cán quea na iin ñájíhí xíní núhú ndihi ini na caja chúun na cuéntá mé á tá quiahva cája chúun na tacú cuéntá mé á. ³⁰Ta ndá na ndúu cuéha ndivaha ndítahan caja na tátuhun na cájii ini. Ta na cájii ini ndítahan caja na tátuhun na ndúu cuéha ndivaha ini. Ta na xéen ñaha ñuyíví yóho ndítahan caja na tátuhun naxeen na ña co cúu ñaha na. ³¹Ta na cómí ñaha ñuyíví yóho, xíní núhú ndindójó na sahá ñaha cán. Jáchi vaxi quivi ndihi saha ñuyíví yóho xihin tóco ndihi ñaha iin nu á.

³²Ña cúni yehe quea ña ná a ndícani nahá ini ndó sahá ñaha ñuyíví yóho. Jáchi tá cámani tandaha in dataa já quea núná nu dá caja chúun da cuéntá Ndióxi xihin ndinuhu ini da. Ta ndúcú da ndá quiahva caja da ña cájii ini Ndióxi xihin. ³³Joo da sa natandaha ndítahan caja chúun da ñuyíví yóho já ná cana ña cuxu na vehe da. Ta cája da ña cájii ini ñájíhí da xihin. ³⁴In da natandaha co xíní da ndía ndihi chága ini da saha, á Ndióxi á ñájíhí da. Ta jári najíhí tá cúu ná na tacú ndíhi ini na caja na ña cúni Ndióxi jáchi ndiquiahva na mé ná ndáha Ndióxi ña ná cacomí a cuéntá saha yiquí cuñu na ta sahá ínima ná. Joo najíhí ndúu yí ndíhi ini na sahá chuun vehe na jáchi cúni na ña ná tahan ini yí ná xihin ná.

³⁵Cahan i ña yóho xihin ndo jáchi cúni chindeé e ndohó ta co cahan i ña sahá ña co cúni ña ná tandaha ndo. Ña cúni quea ná nuná nu ndó caja chúun ndó cuéntá Ndióxi xihin ndinuhu ini ndó ta ná a cájii nuu ni in ñaha nu ndó caja ndó ña cúni Ndióxi.

³⁶Ta ndá da iin jahyi jíhí ta cáhán da ña ndítahan tandaha ña jáchi sa cuahá cuia ña já cuu quiahva da ña ña ná tandaha ña tá cúni da. A juú toho cuachi cúu ña yóho. ³⁷Ta tá cáhán ndo ña co ndítahan toho tandaha jahyi ndó ta cáhán ndo ña cájii ini ña ña coo mé ña já quea vaha va cája

ndó tá cō cája ndúsa ndó xihín ñá ná tandaha ña. ³⁸Vaha cája in dataa tá sahan da ñamani nuú jahyi jíhí da ña ná tandaha ña. Joo vaha chága cája da tá cō cája ndúsa dá xihín ña ña ná tandaha ña.

³⁹Ta a cuú tandaha in ñáñáha xihín inga dataa nani tácu yíi ña. Joo tá naxihí yíi ña já quea candoo núna nu ña tandaha tucu ñá. Joo ndítahan tandaha ña xihín da cuú cuéntá Jesús. ⁴⁰Vatí cáhán i ña cajii chága ini ñá tá ná a tandaha tucu ñá. Ña yóho quea cáhvi ini i sahá ña yóho. Ta ínima yíi Ndióxi quea jácahan yehe cáhí i ña yóho xihín ndo.

Cáhan Pablo sahá ña najoco ñayivi nuú yoco

8 Ta viti cūni ndicani i nu ndo sahá ña ndítahan caja ndó xihín ña najoco na nuú yoco. Vatí cúu á ña ndaa tá cáhí java na ña xini vaha na sahá ña yóho joo tá cáhán yō cúu yó na xini vaha já quea cásahá yō ndínehe jícó yō mí. Joo tá quíhvi iní ñani táhan í já ndindacú chága yó xihín ñaha Ndióxi. ²Tá ndúu java na tañu ndó ta cáhán na ña sa xini na ndaja táhan ñaha, na yóho náha ña cámani cándaa ini na ña ndítahan cándaa ini na. ³Jáchí mé a ndaa xini vaha Ndióxi ndá na cúu na quíhvi ini mé á.

⁴Ta viti cáhan i xihín ndo sahá ña najoco na nuú yoco. Cándaa cáxí iní ña coo a cúu toho yoco ndúu ñuyiví. Ta cándaa cáxí iní ña in tálaa Ndióxi cúu ndusa Ndióxi. ⁵Vatí cáhí ñayivi ña ndúu cuahá ndiόxi ta ndúu cuahá xitoho indiví xihín ñuyiví ⁶joo mí cándaa vaha iní ña íin in túhún Ndióxi, mé a cúu tátá yō. Ta mé á quea nacavaha tóco ndihi ñaha. Ta nacavaha mé á mí ña ná caja cáhnu í mé á. Ta íin in túhún xitoho í ña cúu Jesucristo. Ta mé á quea cája ña ná coo tóco ndihi ñaha ta cája ña ná catacu mí viti.

⁷Joo a juú tóco ndihi na cúu cuéntá Jesús xini ña yóho. Jáchí java táhan na sa cája cáhnu yoco sanahá cán tá xixi na ña najoco ñayivi nuú yoco cáhán na ña cúu á ña najoco na nuú java ndiόxi. Ta xihín ña yóho cáhán na ña cúu ná na sa nayuxu sahá ña naxixi na ña najoco ñayivi nuú yoco. Ta cō xini na á ndítahan cuxu na ña á cō ndítahan cuxu na ña. ⁸Cándehe ndo. Cō ndíquehe toho Ndióxi mí sahá ña xixí. Jáchí cō cúu yó na íin chága saha tá xixí in ñaha. Ta ni cō cúu yó na coo saha tá cō xixí ñaha. ⁹Joo xini ñúhú candehé ndo ña ná a jándicava ndó inga na nuú cuachi sahá ña cája ndó jan. Jáchí vatí xini vaha ndó ña cuu cuxu ndó ña cán joo ndúu java na vitá cuahan íchí cuéntá Jesús. ¹⁰Cúu á tátuhun sácoo ndó cuxu ndó nu cáyahvi ña najoco na nuú yoco jáchí sa xini ndo sahá ña yóho. Ta nani íin ndó xixi ndó jan yáha in da cúu cuéntá Jesús, da vitá xihín ñaha Ndióxi. Ta sahá ña xini da ndohó já quíhvi da jan xixi da xihín ndo vatí cáhán da cúu á cuachi. ¹¹Xihín ña cája ndó jan cuu jándicava ndó da vitá xihín ñaha Ndióxi cán nuú cuachi vatí xini vaha ndó ña cō cája ndó

cuachi tá ná cuxu ndó ña najoco na nuú yoco. Xíní ñúhú ndicuhun ini ndó ña naxihí Jesucristo sahá da jan. ¹²Tá jándicava ndó ñani ndó, da vitá xihín ñaha Ndióxi cán nuú cuachi já quéa cája ndó cuachi nuú Jesucristo viti. ¹³Sahá ña cán quéa tá ná jándicava i ñani i nuú cuachi sahá ña xíxi i cuñu, ña najoco na nuú yoco cája i cuénta a cúxu ga i ña já ná a jándicava i inga da nuú cuachi.

Ña núná nuú in na apóstol caja

9 Méa ndaa yehe cúu u in apóstol cuénta Jesucristo sahá ña cán quéa núná nuú i caja i ña cája in apóstol. Jáchí mí i sa naxini i xihín nuú i Jesucristo, xitoho í. Ta mé ndó nandiquehe ndó íchí cuénta mé á sahá chuun nacaja i ta ña yóho náha ña mé a ndaa cája chúun i cuénta mé á. ²Cája i cuénta ndúu java na ta co ndíquehe na yehe tátuhun in apóstol cuénta Jesucristo. Joo ndóhó ndítahan ndiquehe ndó yehe jáchí nanduu ndó cuénta mé á sahá chuun nacaja i. Ta xihín ña yóho náha ña mé a ndaa cúu u in apóstol cuénta mé á.

³Ta ña yóho cúu tuhun ndúcú ñehe e nuú na cáhan núu sahá i jan: ⁴Ín sahá i ña ná coto ndó yehe. ⁵Ta tá ná coo ñájíhí i, ña cúu cuénta Jesús ín sahá i candaca i ña caca nuu i tá quiahva cája Pedro xihín java ga na apóstol xihín ñani Jesucristo, xitoho í. ⁶Á cáhán ndo ña in túhún yehe xihín Bernabé cúu nde da coó saha ña ná coto na cúu cuénta Jesús ndehe, vaha. ⁷Jáchí ni in túhún toho soldado co quéhe da jiuhún mé dá ta já xito da mé dá. Jári ndá da xútu yitó uva, cuu caxí da uva cána nu dó cán jáchí já cáni a coo a. Ta jári ndá da ndáá ndicachi cuu coho da leche ndicachi ndáá da cán jáchí já cáni a coo a. ⁸Ta a juú cahán ndo ña cáhan i ña quíxi jini mé cuití ví jáchí cáchí ley mé Moisés ña yóho viti. ⁹Já cáchí a já: “A chícayun ñunu yuhú tindiqui nani cája chúun rí sání rí trigo. Joo xíní ñúhú quiahvún ñamaní nu rí caxí rí a”, cáchí tuhun Ndióxi. Joo co ndíhi ini Ndióxi sahá tindiqui cuití va. ¹⁰Saha mí ví nacahyí Moisés ña yóho ta saha mí ví cáhan ña yóho tá cáchí a já. Cúu á tátuhun cája da xútu tátí xihín da jáquee tátí jáchí ndátí ndíví da ndiquehe da táhan nuni cán sahá ña nacaja chúun da xihín á. ¹¹Tá nacahan nde tuhun Ndióxi xihín ndó já cúu á tátuhun nachihin nde tata cuénta Ndióxi ini ínima ndo. Sahá ña cán quéa ndítahan nu ndo chindeé loho ndó ndehe xihín ña cómi ndo jáchí najánaha nde tuhun Ndióxi nu ndo. ¹²Ta mé a ndaa ín chága saha mé nde ña ná coto ndó ndehe a juú ga inga na.

Ta vatí ndítahan nu ndó coto ndó ndehe joo coó nacaja ndúsa nde xihín ndo ña ná caja ndó ña. Ta cuahá tañu cája ndeé ini nde jáchí co cúní nde caji nuu nde ña ná ndicuita nuu tuhun vaha sahá Jesucristo. ¹³Mé ndó sa cándaa vaha ini ndó ña núná nuú na cája chúun ini veñuhu cuxu na ña

jóco ñayivi nu Ndióxi. Ta na cája chúun nu náa Ndióxi veñuhu núná nu ná cuxu na cuñu quítí, rí najoco ñayivi nu Ndióxi. ¹⁴Ta quiahva já cája chúun nde cuéntá Jesucristo, xitoho í cáhan nde tuhun vaha saha mé á. Ta nasahnda mé á chuun ña ná coto na cúu cuéntá mé á ndehe sahá chuun cája nde. ¹⁵Joo ni in túhún tañu coo nacaja ndúsa i xihín ndo ña ná coto ndó yehe vatí cáni nu ndó caja ndó ña. Ta ni co cáhyí i carta yóho nu ndo já ná quiahva ndó ñaha nuú i, vaha. Jáchí mé a ndaa íin vaha ini i cáhan i tuhun Ndióxi xihín ndo ta coo caja toho a ña ná quivi i joco.

¹⁶Yehe co ndínehe jícó i mí i sahá ña xíca nuu i cáhan i tuhun vaha sahá Jesucristo nuú ñayivi jáchí cúu á chuun ndítahan nuú i caja i. Ta ndáhví nahá nacuu u tá ná caja sáa ini i caxi tuhun i ña. ¹⁷Tá ná cája i chuun yóho sahá ña cúni mí i cuití va já quea cuu quehe e yahvi sahá. Joo co cája toho i já jáchí nacaxi Ndióxi yehe cahán i tuhun mé á sahá ña cán quea ndúsa cája i ña. ¹⁸Ta sa mé yahvi quehe e sahá chuun cája i quea cájii ini i tá cáhan i tuhun vaha sahá Jesús nuú ñayivi ta co cháhvi na sahá. Ta cájii ini i jáchí co cája ndúsa i xihín ndo ña ná coto ndó yehe tá quiahva cája ndó xihín java ga na cáhan tuhun Ndióxi xihín ndo.

¹⁹Vatí mí i co cúu u mozo ñayivi joo cája chúun i mí i tátuhun mozo saha tóco ndihi ñayivi. Jáchí caxi tuhun i tuhun vaha sahá Jesucristo nu ná já ná cuu ndicuaḥa chága na cúu cuéntá Jesús. ²⁰Tá xíca nuu i tañu na Israel ndája i mí i tátuhun in da Israel jáchí ña cúni quea ná ndiquehe na íchi cuéntá Jesús. Ña cúni cachi i quea tá íin i tañu na cája ley Moisés in cája i xihín ná vatí co ndíco i íchi cuéntá ley Moisés viti. Joo cája i ña sahá ña cúni i ña ná ndiquehe na íchi cuéntá Jesús. ²¹Ta tá xíca nuu i tañu na co cája ña sáhndá ley Moisés já cája i tá quiahva cája mé ná jáchí cúni ña ná ndiquehe na íchi cuéntá Jesús. Joo co cája i cuachi tá quiahva cája na cán jáchí sáhndá ley Ndióxi chuun nuú i viti ta cája i ña cúni Jesucristo cuití va. ²²Ta tá xíca nuu i tañu na vitá xihín ñaha Ndióxi já quea jánuu ndáḥa i mí i jáchí cúni ña ná ndindacú na xihín tuhun mé á. Na cúni cachi i xihín ndo quea ndája i mí i tátuhun ndá na nacuu va jáchí cúni quee vaha i xihín ná já ná ndihvi na íchi cuéntá Jesús ña ná cacu ndaa ínima ná. ²³Cája i tóco ndihi ña yóho já quea ná ndicuḭta nuu tuhun vaha cáhan sahá Jesucristo. Jáchí xihín ña yóho caja cuaha Ndióxi ñamani xihín i.

²⁴Candehé ndo. Sa xíní vaha ndó ña tá jáquehe táhan java taa tuhun da ña ná cunu da, mé a ndaa tóco ndihi da ndúcú ndéé da xínu da. Joo in túhún da quee vaha. Ta já quehe da ña ndítahan nu dá quehe da. Quiahva já ndítahan caja ri ndóhó va. Xíní ñúhú nducú ndo cuhun vaha ndó íchi cuéntá Jesús janda quiahva ná xínu coo ndó janda nu ndíhí cuíí já ná quiahva Ndióxi nu ndo ña ndítahan ndiquehe ndó. ²⁵Tóco ndihi ñayivi tá cája tiaḥva na mé ná ña ná cuhun na cunu na, co cúni na caja na ndá ña

nacuu jáchi ndáá na mé ná. Tócó ndihi ña yóho cája na sahá ña cúni na quee vaha na ña ná ñehe ná in tiyivi ita sánúu jini ná vatí cama chá íchi ita cán. Joo mí ndúcú ndée yo cuahan yó íchi cuéntá Jesús jáchi ña ndátí mí quiahva Ndióxi nu yo co ndíhi sahá andá ama cáa quivi. ²⁶Joo co cúú u in da xínu cuáá. Ta ni co cúú u tátuhun in da jácana yiquí nuú tachi. Jáchi ndúcú ndée e quee vaha i já ná ndiquehe e ña quiahva Ndióxi nuú i. ²⁷Ña cája i quéa cája ndúsa i xihin yiquí cuñu i ña ná caja i ña cúni Ndióxi. Jáchi a juú tiahva náá jándacoo Ndióxi yehe vatí mí i cúú u da najánaha tuhun Ndióxi nuú ñayivi.

Cáhan Pablo ña co ndítahan caja cáhnu na yoco

10 Candehé ndo ñani i, na cúú cuéntá Jesús. Co cúni ña ná ndindójó ndo ndá quiahva nacaja Ndióxi sanahá xihin tásáhnu jícó yo tá nasandaca mé á na yucú íchí cán. Nacaja mé á ña ná xinu in vico núhu xoo nuú cuahan na ña ná candaca a na. Ta nachindee a na ña ná cuu cojo cava na tañuhú naní tañuhú cuáhá. ²Ta tócó ndihi na cán in nanduu ndihi na xihin Moisés tá nayaha na tañuhú nani ndáca vico núhu na. Nasacuu a tátuhun nacandúta ná ña ná cacomí Moisés cuéntá sahá ná. ³Ta tócó ndihi na cán naxixi na ña nachindahá Ndióxi, ña naquixi a nu ná chí indiví. ⁴Ta quiahva já tócó ndihi na cán naxihi na ticuí, dó nasahan mé á nu ná coho na. Mé ticuí cán cúú dó dó nacana tixi in tóto. Ta mé tóto cán cúú á tátuhun yuhú nuu Jesucristo, mé a nasahiin xihin ná nani naxica nuu na yucú íchí cán. ⁵Joo cuahá ndivaha táhan na cán nacaja na ña núu ña co cájii íni Ndióxi xihin. Sahá ña cán quéa naxihi na mé yucú íchí nu xíca na cuahan na cán.

⁶Tócó ndihi ña nayaha yóho jánaha nu mí ña co ndítahan ndiava iní ña co táhán ini Ndióxi xihin tá quiahva nacaja na cán. ⁷Sahá ña cán quéa coto a juú caja cáhnu ndó yoco tá quiahva nacaja java na cán jáchi já cáchí tuhun Ndióxi já: “Tócó ndihi ñayivi cán nasacanduu na xíxi na ta xíhi na ta já nandicuita na xíta sáhá na ña cája cáhnu na yoco”, já nacaja na cáchí tuhun Ndióxi. ⁸Joo mí xíni núhu candaa í mí já ná a cája í cuachi ña quihvi nuu í xihin inga najihí á xihin inga dataa tá quiahva nacaja java na cán. Ta sahá cuachi nacaja na cán naxihi oco uni mil na in túhun quivi. ⁹Ta co ndítahan nu yo coto ndojó yo Jesucristo, xitoho í ña ná candehé yo á mé a ndaa jándoho a iní sahá cuachi cája í. Jáchi quiahva já nacaja java na cán va ta sahá ña cán naxihi na nacaja cuahá coo. ¹⁰Coto a cáhan cuéhé ndó sahá Ndióxi tá quiahva nacaja java tásáhnu jícó yo cán. Jáchi sahá ña nacaja na naxihi na nacaja táto Ndióxi, mé a xíca sáhní ñahá.

¹¹Tócó ndihi ña nayaha xihin tásáhnu jícó yo cúú á ña náha nu yo ña co ndítahan quehe núu í Ndióxi. Ta nacahyi a nuú tuhun Ndióxi já ná cuni mí,

yó ndúu tiempo yóho ña co ndítahan caja í tá quiahva nacaja na cán jáchi sa nacayati quivi ndihi saha ñuyivi. ¹²Ña cán quea tá cáhan ndo cuahan vaha ndó íchi cuénta Ndióxi já quea xini ñúhú candaa vaha ndó mé ndó já ná a ndícava ndó nuú cuachi. ¹³Candehé ndo. Xini ñúhú ndicuhun ini ndó ña a juú mé ndó cuití quixi tondóhó nuu jáchi quixi tondóhó jan nu tóco ndihi java ga ñayivi. Ta ndítahan candee ini ndó Ndióxi jáchi a quiahva toho mé á ñamani ña ná quixi tondóhó náhnu nu ndo ña co cándee ndó xihin. Ña cája Ndióxi quea chindee a ndohó tá ná quixi tondóhó nu ndo já ná cuu caja ndee ini ndó tá ná ndoho ndó ña.

¹⁴Candehé ndo ñani i, na cúu cuénta Jesús. Xini ñúhú jándacoo vaha ndó ña cája cáhnu ndó yoco. ¹⁵Tá quiahva cáhan i xihin ñayivi tácu ini quiahva já cáhan i xihin ndo. Ta mé ndó cándaa vaha ini ndó á ndaa á a ndaa quea cáhan i xihin ndo. ¹⁶Ná ndiquiahva í ndixahvi nu Ndióxi tá ndicuhun iní sahá ña nacaja Jesucristo tá naxihi a saha yo. Jáchi tá xihí vino ña yii já cúni cachi a ña in nanduú xihin mé á sahá ña naxita nii mé á ndica crúxu saha yo. Ta jári tá xixi pan ña yii ña sáhdá java nu táhan í cúni cachi a ña in nanduú xihin mé á jáchi ndiquiahva yiquí cuñu a saha yo. ¹⁷Ta vatí cuahá ndivaha cúu yó joo in túhún pan sáhdá java í xixi jáchi xihin ña yóho náha ña in cúu ndihí xihin Jesucristo.

¹⁸Xini ñúhú candehé ndo ndá quiahva cája na Israel jáchi tá sáxi na cuñu quíti, rí najoco inga na nu náa cán já cúu á tátuhun mé ná nasahní na mé quíti cán ta najoco na ri. Quiahva já yáha xihin mé ndó tá sáxi ndó cuñu ña najoco na nuú yoco. Cúu á tátuhun najoco mé ndó ña. ¹⁹Joo xini ñúhú ndicuhun ini ndó tá cáchi i ña yóho xihin ndo co cúni cachi i ña íin sahá yoco. Ta ni co cúni cachi i ña íin chága sahá cuñu najoco na nuú yoco a juú ga inga cuñu. ²⁰Ña cúni cachi i xihin ndo quea tá ná joco ñayivi, na co xini Ndióxi jan in quíti nuú yoco cúu á tátuhun jóco na jan ri nuú tiñáhá va. Ta co cája toho na ña nu Ndióxi. Ta cáxi tuhun i ña yóho xihin ndo já ná a cáxi ndó cuñu jan jáchi tá ná caxi ndó ña cacuu a tátuhun najoco ri ndóhó va ña nuú tiñáhá. ²¹Jáchi a cuú cuhun ndo coho ndó ña najoco na nuú rí quini ta já quixi ndó coho ndó ña yii cuénta Jesucristo, xitoho í. Ta ni a cuú cuxu ndó ña najoco na nuú rí quini ta já cuxu ndó ña yii, ña xixi na tá ndicuhun ini na ña naxihi Jesucristo, xitoho í. ²²A cája ndó ña yóho jáchi cúu á tátuhun cúni ndó jácojo ndó ini Ndióxi. Xini ñúhú ndicuhun ini ndó ña co cúu ndó na ndacú chága a juú ga Ndióxi.

**Sahá ña quíhvi iní ñani táhan í co ndítahan caja í ndá ña
nacuu cúni mí caja í**

²³Ndúu java na ta cáchi na já: “Núná nu yo caja í ndá ña cúni mí caja í.”
Vatí ña yóho cúu á ña ndaa joo a juú ndihi ña cája í cája vaha xoho. Mé a

ndaa núná nu yó caja í ndá ña cúní mí joo cō chindeé a mí cuahnu í xihín ñaha Ndióxi. ²⁴Cō ndítahan nu yó nducú yó ña vaha mí cuití yó. Ndítahan ndihi iní caja í ña vaha sahá ñani táhan í.

²⁵Cuu caxí ndó ndijáa cuñu cáyahvi nuú yahvi ta a ndáca tühún ndó ndájá naquixi a já ná a cáhvi ivi joho ini ndó xihín á. ²⁶Jáchí ñaha Ndióxi, xitoho í cúu ñuyiví yóho xihín tóco ndihi ña íin nu á.

²⁷Candehé ndó. Tá ná cana in na cō cúu cuéntá Jesús ndohó ña ná cūhun ndó cuxu ndó xihín ná, cuáhán ndó tá cúní ndó ta cuxu ndó tóco ndihi ña sácú na nu ndó cuxu ndó. Ta a ndáca tühún ndó na á naquixi a nuú yoco. Cuxu ndó ña jáchí tá ná ndáca tühún ndó na já cuu casáhá ndicani ini ndó xihín á. ²⁸Joo tá sa naçaxi tūhun yachí na xihín ndó ña cúu á cuñu najoco na nuú yoco já queá a cúxu toho ndó ña. Jáchí tá ná cuxu ndó ña já queá caja ndó ña ná a váha cuu ini mé na cán. ²⁹Cáhan i ña yóho jáchí cúní ña ná caja vaha ndó sahá inga na. Cō cáhan i ña saha mé ndó.

Mé a ndaa ndúu java ndó ta cáhán ndó ña cō ndítahan ndihi ini ndó sahá ña cáhvi ini inga na jáchí cáhán ndó ña núná nu ndó caja ndó ña cúní ndó. ³⁰Ta java ndó cáhán ndó ña tá sa nandiquiahva ndó ndixahvi nu Ndióxi sahá ña xíxi ndó já queá a cuú cahan núu ñayivi sahá ña cája ndó. ³¹Joo cáchí i xihín ndó ña xíní ñúhú candehé vaha í ña cája í ná a jándicava í inga na nuú cuachi. Jáchí janda xihín ña xíxi ta xihín ña xíhí, xíní ñúhú caja cáhnu í Ndióxi. ³²Cō ndítahan cacuú na jándicava inga ñayivi nuú cuachi jáchí tá cája í já cúu yó tátūhun yuu cándúhu jácachihin sahá ñayivi. A cája ndó já xihín na Israel ta ni xihín na tóho ta ni xihín na cúu cuéntá Jesús. ³³Ta tóco ndihi ña cája i, cája i ña ná cajii ini ndihi ñayivi xihín. Ta cō ndúcú u ña vaha mí i jáchí ndúcú u ña ná cajii ini ñayivi já ná cuu cacu ndaa ínima ná.

11 Xíní ñúhú caja ndó táquiahva cája yehe jáchí quiahva já cája i ña naçaja Jesucristo, xitoho í.

Ña ndítahan nuú najihí caja na tá cája cáhnu na Ndióxi

²Cájii iní i xihín ndó, ñani i, na cúu cuéntá Jesús. Jáchí níi tiempo núhu ini ndó sahá i ta cája ta cája ndó ña najánaha i nu ndó. ³Joo cúní ña ná candaa ini ndó ña cúu Jesucristo jini nuú in in taa. Ta quiahva já in in taa cúu dá jini nu ñájihí da. Ta quiahva já Ndióxi cúu á jini nuú Jesucristo. ⁴Sahá ña cán queá tá cō cándaa in dataa yijini dá nani xíca tahví da nu Ndióxi á nani cáhan da tūhun Ndióxi nu táca ñayivi já queá náha ña cō cája cáhnu da Jesucristo, mé a cúu jini nu mé dá. ⁵Ta in ñáñáha tá cō chíjahvi ná jini ña nani xíca tahví ña nu Ndióxi á nani cáhan ná tūhun Ndióxi nuú ñayivi veñuhu já queá náha ña quéhe núu ná yíi ña, da cúu jini

nu mé ñá. Cúú á tátuhun najatá ñá jini ñá. ⁶Jáchí tá cō chíjahvi in ñáñáha jini ñá janda vaha chága ví ná jatá táhyí ñá jini ñá. Joo tá cáhan ñá ña quini canáha jini ñá tá ná jatá táhyí ñá jini ñá já quéa xíní ñúhú chijahvi ñá jini ñá. ⁷Cō ndítahan toho nuú in dataa chíjahvi da jini dá veñuhu jáchí mé dá cúú dá da nacavaha Ndióxi xihín yuhú nu mé á. Ta mé dá cúú dá da náha ndá quiahva cáhnu cúú Ndióxi. Ta náha in ñáñáha ñá yíí ñá cúú dá jini nu ñá. ⁸Jáchí xíní ñúhú ndicuhun ini ndó ñá cōó natavá toho Ndióxi lásá yiquí ndícá ñáñáha já nacavaha mé á dataa, vaha. Ña nacaja mé á quéa natavá a lásá yiquí ndícá dataa ta já nacavaha mé á ñáñáha. ⁹Jihna ñúhú nacavaha Ndióxi dataa ta já nacavaha mé á in ñáñáha chindeé ñá da. ¹⁰Ta sahá ña jihna ñúhú ga nacavaha Ndióxi dataa sahá ña cán quéa ndítahan nuú in ñáñáha chíjahvi ñá jini ñá ná náha ñá nu táto Ndióxi ñá mé a ndaa cája cáhnu ñá yíí ñá. ¹¹Joo mí, na cúú cuéntá Jesús ndítahan candaá iní ña xíní ñúhú táhan ta xihín ñáha. ¹²Vatí nacavaha Ndióxi ñáñáha nu cuítí xihín lásá yiquí ndícá dataa joo viti tóco ndihi dataa cácu da ñuyíví yóho cája najihí. Joo tóco ndihi ñayivi tácu na jáchí já cúni Ndióxi.

¹³Mé ndó xíní ñúhú candeheé ndó á vaha á a váha toho ña ná a chíjahvi in ñáñáha jini ñá nani xíca tahví ña nu Ndióxi veñuhu. ¹⁴Jáchí sa cándaá vaha iní ña a váha toho cája dataa tá íin nani íj jini dá. ¹⁵Joo ndisáhnu náha ñáñáha tá íin nani íj jini ña jáchí Ndióxi nasahan íj jini ñá nu ña já ná chíjahvi a jini ñá. ¹⁶Joo tá ndúu java na ta cō táhán ini na xihín ña cáhan i yóho já quéa cō cúni toho i nditúhún ihvi i xihín ná sahá ña yóho. Jáchí xíní ñúhú candaá ini na ña ndijáá java ga na cúú cuéntá Jesús cája na tá quiahva cáchí i yóho tá táca na veñuhu.

Jánani Pablo na cúú cuéntá Jesús jáchí cō cája ndisáhnu na tá táca na cajíni na ña yíí cuéntá Jesús

¹⁷Ta íin inga náha cúni cahan i xihín ndó saha ta cō táhán ini i xihín á. Jáchí ñañehé e tuhun ña cō cája vaha ndó tá táca ndó veñuhu. ¹⁸Cándeheé ndó. Sa ñañehé e tuhun ña sáhdá java táhan ndó tá táca ndó cája cáhnu ndó Ndióxi. Ta cája i cuéntá cándusa i ña cáchí na saha ndó. ¹⁹Vatí mé a ndaa náha xíca a ña ndítahan cahnda táhan ndó já ná cuu cuni ñayivi ndá ndó cúú ndusa cuéntá Jesús ta ndá ndó cō cúú cuéntá Jesús. ²⁰Ta sahá ña sáhdá táhan ndó nu táca ndó jan, náha ña quéhe núu ndó ña yíí xíjini ndó ta xihín ña yóho cō cúú ga ña cuéntá Jesucristo, xitoho í. ²¹Jáchí tá ndíndaa hora cajíni ndó tá in tá in ndó sa jihna ñúhú ndó ndáva ndó cuahan ndó quehe ndó ña cajíni mé cuítí ndó. Ta java ndó ni cō ñéhe ndó ña cuxu ndó. Joo java ndó xíhi ndó janda jáxini ndó mé ndó. ²²Vaha chága ná cuxu ndó ta ná coho ndó vehe ndó a juú ga ña ná quixi ndó quehe núu

ndó veñuhu Ndióxi. Ta a váha cája ndó jáchi co ñéhe na ndahví ña cuxu na cája ndó ta xihín ña yóho cácahan nu ná. A cándati toho ndó ña cajii ín i xihín ña cája ndó yóho jáchi a juú ña vaha quéa cája ndó.

Ña ndítahan caja na cúu cuéntá Jesús tá xijíni na ña yii cuéntá Jesús

(Mt. 26:26-29; Mr. 14:22-25; Lc 22:14-20)

²³Ña jánaha i nu ndo yóho cúu ña najánaha Jesucristo, xitoho í nuú i. Jáchi mé nuú tá cámaní ndiquiahva na mé á ndáha na ihvi a já natiin a in pan. ²⁴Tá nandihi ndiquiahva ndixahvi nu Ndióxi já nasahnda java ña ta já nacachi a já xihín ná: “Mé pan yóho cúu á tátuhun yiquí cuñu i ña ndiquiahva i saha mé ndó. Xíní ñúhú caja ndó ña yóho ña ná ndicuhun ini ndó ña naxihi i saha ndo”, nacachi Jesús. ²⁵Ta tá nandihi naxijíni na cán já natiin a in vaso nu ñúhu tó uva. Ta já nacachi a já: “Dó ñúhu ini vaso yóho cúu dó tátuhun níi i, dó cuíta saha ndó. Ta xihín dó yóho xinu coo nuú tuhun nasahan Ndióxi nuú ñayivi sanahá tá nacachi a jácacu a ñayivi. Ndijáá tañu tá ná coho ndó mé tó uva, dó yii ndítahan ndicuhun ini ndó ña naxihi i saha ndo”, nacachi Jesús. ²⁶Sahá ña cán quéa ndijáá tañu tá táca ndo xíxi ndó pan ta xíhi ndó tó uva yóho cúni cachi a ña ndicuhun ini ndó ña naxihi Jesucristo, xitoho í saha ndo. Ta xíní ñúhú caja ndó ña janda quiahva ná quixi tucu mé á ñuyívi yóho.

²⁷Candehé ndo. Tá ná cuxu ndó pan ta tá ná coho ndó tó uva, ña yii cuéntá Jesucristo, xitoho í ta co íin vií ínima ndo já quéa cája ndó cuachi nu mé á ta quéhe núu ndó ña naxihi a ndica crúxu saha ndo. ²⁸Sahá ña cán quéa tá cámaní casahá cajíni ndó ña yii cuéntá Jesús xíní ñúhú coto ndojó jihna ndó mé ndó á vií ínima ndo nu Ndióxi á coo vií a. ²⁹Jáchi tá ná cuxu ndaja nacuu ndó ña yii cuéntá Jesús já quéa náha ña quéhe núu ndó mé á. Jáchi ña xíxi ndó jan cúu á tátuhun yiquí cuñu mé á ta dó xíhi ndó jan cúu dó tátuhun níi á. Ta tá ná quehe núu ndó ña já quixi ña ndoho ini ndó caja Ndióxi. ³⁰Sahá ña cája ndó jan cuaha táhan ndó quíhvi ta cuaha ndó cávitá ndó ta anda java na sa naxihi ná sahá ña naquehe núu na ña yii cuéntá Jesús. ³¹Joo tá ná coto ndojó yo mí ña á íin vií ínima yo nu Ndióxi já quéa a ndítahan toho nu mé a cúu xitoho í caja vií a sahá cuachí. ³²Joo tá jándoho mé á ini mí cúu á sahá ña co cúni a ña ná ndoho ín xihín ñayivi ñuyívi tá ná xinu coo quívi caja vií mé a cúu xitoho í sahá cuachi nacaja na cán.

³³Candehé ndo, ñani i, na cúu cuéntá Jesús. Ña ndítahan caja ndó cúu ña yóho. Tá ná nditaca ndó cajíni ndó ña yii cuéntá Jesús xíní ñúhú candati táhan ndó janda quiahva ná taca tóco ndihi ndó. ³⁴Ta tá cuíco ndó já quéa xíní ñúhú cuxu ndó vehe ndó já ná a jándoho Ndióxi ini ndó sahá ña cája ndó ña núu tá táca ndo cajíni ndó ña yii jan. Ta caja vií i sahá java ga ñaha tá ná saa i coto nihni i ndohó jan.

Ña ñéhe táhvi ñayivi nu ínimā yīi Ndióxi

12 Candehé ndó, ñani i, na cúu cuéntá Jesús. Cáhyí i ña yóho nu ndo jáchi cúní ña ná candaa ini ndó ndaja íin ña sáhan ínimā yīi Ndióxi nu yó.

²Mé ndó sa cándaa vaha ini ndó ña tá cámaní ndiquehe ndó íchi cuéntá Jesús já nasacuu ndó tátuhun ñayivi cuáá jáchi nasanduu ndó ndáha tá nuú yoco, ña coó tachi cáhan. ³Ta viti cúní caxi tühún i xihín ndo ña ni in ñayivi a cuú chícaan na chahan jata Jesús tá ta ínimā yīi Ndióxi quéa sáhan tühun nu ná cáhan na. Ta tá cáchí na xihín ndinuhu ini na ña Jesús cúu xitoho na já quéa náha ña ínimā yīi Ndióxi quéa sáhan tühun nu ná cáhan na.

⁴Cuahá nuú ñaha ñéhe táhvi ñayivi caja na cuéntá Ndióxi ta in túhún ínimā yīi Ndióxi sáhan ña nu ná. ⁵Cuahá nuú chuun cuu caja ñayivi cuéntá Ndióxi ta tóco ndihí cája chúun í cuéntá mé a cúu xitoho í. ⁶Ta sa jīin sa jīin cája in in í chuun nasahan Ndióxi nu yó caja í. Joo in túhún mé á quéa sáhan ña yóho nuú in in í caja í. ⁷Ta sáhan Ndióxi in ñaha nuú in in í já náha ña ñúhu ínimā yīi Ndióxi iní ta xihín ña yóho cuu chindeé yó tóco ndihi na cúu cuéntá Jesús. ⁸Ínimā yīi Ndióxi yóho quéa cája ña ná cuu candaa ini java ñayivi ndaja íin ña vaha xihín ña a váha ta já ndicani na ña nuú ñayivi. Ta sa mé ínimā yīi Ndióxi quéa cája ña ná cuu cáhan ñayivi ña ndíchí ndivaha. ⁹Ta cája mé ínimā yīi Ndióxi yóho xihín java na ña ná candee cáhnu ini na mé á. Ta sáhan mé ínimā yīi Ndióxi nuú java na ña ná cuu ndaja vaha na na quíhvi. ¹⁰Java na ñéhe táhvi ná caja na ña xitúhún. Ta java na ñéhe táhvi ná jáyaha na tühun nacahan Ndióxi xihín ná nuú ñayivi. Ta java na ñéhe táhvi ná ndicuni na ndá na cúu na cája chúun cuéntá ínimā yīi Ndióxi ta ndá na co cája chúun toho cuéntá mé á. Ta java na ñéhe táhvi ná cáhan na tühun ña coó nasatiahva na. Ta java na ñéhe táhvi ná nducú ñehe na ña cúní cachi tühun cáhan na cán nuú ñayivi. ¹¹Ta sa mé ínimā yīi Ndióxi cája tóco ndihi ña yóho ta in túhún mé á sáhan nuú in in ñayivi ña sácú ini a caja chúun vaha na xihín.

In cúu tóco ndihi na cúu cuéntá Jesús sahá ña cándee ini na mé á

¹²Candehé ndo. Cuahá ndivaha nu ndáca yiquí cuñu í joo in víxí cúu á. Quiahva já íin xihín na cúu cuéntá Jesús. ¹³Ta quiahva já yáha xihín tóco ndihi mí, coó caja toho a á cúu yó na Israel á co cúu yó na Israel. Ta coó caja toho a á cúu yó na cómí in xitoho cuéntá saha, á cúu yó na xíca núná mé. Jáchi cája ínimā yīi Ndióxi ña cúu yó tátuhun in víxí ñayivi sahá ña in nanduú xihín Jesucristo tá nacandúta yó cuéntá mé á. Ta in túhún ínimā yīi mé á nasacu a ini ínimā in in í.

¹⁴Xíní ñúhú ndicuhun iní ña a juú in víxí nu ndáca yiquí cuñu í jáchi cuahá ndivaha nu ndáca yiquí cuñu ñayivi. ¹⁵Candehé ndo. Cúu á tátuhun tá ná cahan in xoo saha yo já cáchí a já: “Yehe co cúu toho i ndáha ñayivi sahá ña cán quéa coó chuun toho i nuú yiquí cuñu na”, cáchí a. Joo co cája toho ña cahan saha yo yóho jáchi cúu á cuéntá yiquí cuñu í. ¹⁶Ta cúu á tátuhun tá ná cachi in johó í já cáchí a já: “Yehe co cúu toho i nduchú núú ñayivi sahá ña cán quéa coó chuun toho i nuú yiquí cuñu na”, cáchí a. Joo co cája toho ña cahan johó í yóho jáchi cúu á cuéntá yiquí cuñu í. ¹⁷Jáchi caja mé ndó cuéntá ndaja caja í cuni johó í tá níí cúu yiquí cuñu í ná cacuu a nduchú núú yo. Ta ndaja caja í tahmí ñaha tá níí cúu yiquí cuñu í ná cacuu a johó í. ¹⁸Joo in in ña ndáca yiquí cuñu í yóho nasacu Ndióxi ña mé nu ndítahan coo a jáchi já nasacu ini a caja. ¹⁹Xíní ñúhú caja ndó cuéntá tá in víxí johó ná candaca níí cúu yiquí cuñu í já quéa co íin ndihi toho yiquí cuñu í. ²⁰Ta vatí cuahá ndivaha nu ndáca yiquí cuñu in in í joo in víxí cúu yiquí cuñu í. Ta quiahva já íin a xihín na cúu cuéntá Jesús.

²¹Candehé ndo jáchi sácú u in quiahva nu ndo: Nduchú núú yo a cúu cachi a xihín ndáha yo ña co xíní ñúhú a ña. Ta ni yiquí jíní yo a cúu cachi a xihín saha yo ña co xíní ñúhú a ña. ²²Ña yáha xihín yiquí cuñu í cúu ña yóho. Java tañu cáhán yo ña vitá in ñaha ndáca yiquí cuñu í joo ña jan xíní ñúhú chága yó ña. ²³Ta mé xoo yiquí cuñu í ña cáhán yo coó cuahá saha, ña co cúni yo ña ná candehé ñayivi, ña cán cúu ña chíjahví vaha í ²⁴vatí co xíní ñúhú caja í já xihín ñaha ña cuu candehé ñayivi. Xihín ña yóho cuu candaa iní ndá quiahva nacavaha Ndióxi in in xoo yiquí cuñu í ta cuu candaa iní ndaja candaa vaha chága yó ña cáhán yo coó cuahá saha. ²⁵Ta xihín ña yóho co sáhndá java táhan yiquí cuñu í jáchi in in xoo yiquí cuñu í ndíhi ini a sahá java ga xoo yiquí cuñu í. ²⁶Ña cán quéa tá ndícuehe in xoo yiquí cuñu í ndijáá java ga ña cán ndíhíhvi a sahá ña ndóho in xoo yiquí cuñu í. Joo tá víí cája na xihín in xoo yiquí cuñu í já quéa cájii ini java ga xoo yiquí cuñu í.

²⁷Ta tóco ndihi ndó, na cúu cuéntá Jesús cúu ndó tátuhun yiquí cuñu Jesucristo jáchi in nanduu ndihi ndó xihín á ta in in ndó cúu ndó tátuhun in xoo yiquí cuñu a. ²⁸Ta tá quiahva íin chuun cája in in xoo yiquí cuñu í quiahva já íin chuun caja in in na cúu cuéntá Jesús. Jihna ñúhú nacaxi Ndióxi na apóstol ta já nacaxi a na jáyaha tuhun Ndióxi nuú ñayivi ta já nacaxi a na jánaha tuhun Ndióxi nuú ñayivi ta já nacaxi a na cája ña xitúhún. Ta já nacaxi a na ndája vaha na quíhvi xihín na chindeé ñayivi xihín na sáhndá chuun nuú java ga ñayivi xihín na cahan tuhun ña coó nasatiahva na. ²⁹Joo a juú ndihi na cán cúu apóstol. Ta ni a juú ndihi na cúu ná na jáyaha tuhun cahan Ndióxi nuú ñayivi. Ta ni a juú ndihi na jánaha ñayivi. Ta ni a juú ndihi na cája ña xitúhún. ³⁰Ta ni a juú ndihi na ndája

vaha na na quíhvi. Ta ni a juú ndihi na cáhan tūhun ña coó nasatiahva na. Ta ni a juú ndihi na tiahva nducú ñehe ña cúní cachi tūhun cáhan na cán. ³¹Joo mé ndó xíní ñúhú ndinducú ndo ña ná quiahva Ndióxi in ña vaha chága nu ndo. Ta viti cúní jánaha i ña cúu ña vaha chága nu ndo.

Ña ndítahan caja í tá quíhvi iní ñayivi

13 Tá ná cuucahan i tá nuú tūhun cáhan ñayivi ndúu ñuyíví yóho ta tá ná cuu cahán i tūhun cáhan táto Ndióxi joo tá co quíhvi iní i ñayivi já quéa coó saha toho ña cáhan i. Jáchí xihín ña jan cúu u tátūhun in caa jácasá na, á tátūhun in caa xoo tá jácasá na ña. Quiahva já íin i tá co quíhvi iní i ñayivi. ²Ta ni coó sahá ña ná cacuu u in da jáyaha tūhun cáhan Ndióxi nuú ñayivi tá co quíhvi iní i ñani táhan i. Jáchí tá co quíhvi iní i ñayivi coó caja toho ña ná cuu candaá iní i tóco ndihi ñaha ta ni coó caja toho a tá xíní tóco ndihi ña xíní da ndichí ta ni coó saha toho tá cándéé cáhnu ndivaha iní i Ndióxi janda quiahva cuu cahán i xihín in yucu ña ná ndicanda ña. Coó saha toho tóco ndihi ña yóho tá co quíhvi iní i ñani táhan i. ³Ta vatí ná ndicahnda i tóco ndihi ña cómí i ta já quiahva i ña nuú na ndahví coó sahá toho ña cája i tá co quíhvi iní i ñayivi. Ta ni coó caja toho ña ná ndiquiahva i yiquí cuñu i ña ná cayí a sahá ña cáhan i tūhun Ndióxi tá co quíhvi iní i ñayivi.

⁴Jáchí tá mé a ndaa táhyí quíhvi iní ñayivi co ndíhi iní xihín ná. Ta tá quíhvi iní na táhvi iní saha ná ta co cáhíhvi toho iní xihín ná. Ta ni co cája lándá yo nu ná ta ni co cája cáhnu í mí nu ná. ⁵Tá quíhvi iní ñayivi íin toní ñúhú yo xihín ná ta co cájihnda yó ñaha nu ná jáchí co nducú yo ña vaha mé cuití yo. Ta ni co xójo iní xihín ná. Ta ni co quéhé cuéntá sahá ña núu cája na xihín yo tá quíhvi iní na. ⁶Ta tá quíhvi iní ñayivi co cájii toho iní tá cája núu na joo cájii iní tá cája na ña ndaa. ⁷Tá quíhvi iní ñayivi íin tiahva í ndoho iní saha ná ta cáhvi iní ña vaha cuití va saha ná. Ta cándúsa í ña cája na ña ndaa. Ta sáhan ndeé iní xihín tóco ndihi ñaha.

⁸Tá mé a ndaa quíhvi iní ñani táhan í já quéa anda ama caa quiví a ndíhi sahá ña quíhvi iní na. Joo vaxi quiví a jáyaha ga ñayivi tūhun cáhan Ndióxi xihín ná nuú ñayivi jáchí vaxi quiví ndihi sahá. Ta a cáhan ga na tūhun ña coó nasatiahva na. Ta vaxi quiví ndihi sahá ña ndichí jíní ñayivi. Joo a ndíhi toho saha ña quíhvi iní táhan í. ⁹Jáchí chá cuití xíní yó saha Ndióxi ta chá cuití tiahva í jáyaha í tūhun cáhan Ndióxi nuú ñayivi. ¹⁰Joo tá ná xinu coo quiví ndaja Ndióxi ña ná nduú ñayivi víí já quéa a cúní ñúhú ga yó ña tóco ndihi java ga ña ndihi saha cán jáchí sa nanduú ñayivi víí nu mé á.

¹¹Candehé ndo. Tá nasacuu u in taa loho nacahan i tá quiahva cáhan na valí ta quiahva já nacahvi iní i ta quiahva já nacaja i. Joo tá nasahnu i

najándacoo i ña cája na valí. ¹²Viti co cándaa vaha iní ndá quiahva cáa Ndióxi. Cúu á tátuhun tá sándehé yo nuú in yutátá ña co jínu vaha ga. Joo vaxi quivi cuní mé á tá quiahva cáa. Viti cuahá ñaha co cándaa iní saha mé á. Joo vaxi quivi candaa iní saha mé á tá quiahva xíní mé á mí viti. ¹³Ín uní nuú ñaha ña a ndíhi sahá. Ta ña yóho cúu á: ña cándeé iní Ndióxi, ta inga cúu ña ndátí casaa, ta inga cúu ña quíhvi iní Ndióxi xihín ñani táhan í. Ta cúni Ndióxi ña ná caja í ndihuni ña yóho joo ña cáhnu chága cúu ña quíhvi iní Ndióxi xihín ñani táhan í.

Tá cáhan ñayivi tuhun ña coó nacatiahva na

14 Xíní ñúhúndíhi ini ndó quíhvi ini ndó ñani táhan ndó. Ta xihín ndinuhu ini ndó ndinducú ndo ña sáhan ínimá yíi Ndióxi nu yo. Ña xíní ñúhú ndíhi chága ini ndó ndinducú ndo cúu ña ná cuu jáyaha ndó tuhun cáhan Ndióxi xihín ndó nuú ñayivi. ²Jáchí ndá na nacuu cáhan tuhun ña coó nacatiahva na já quéa cáhan na xihín Ndióxi joo co cáhan na xihín ñayivi jáchí co cándaa ini ñayivi ña cáhan na. Ña cáhan na cúu ña naquixi cuéntá ínimá yíi Ndióxi ta cúu á ña co xíní ndíhi ga ñayivi. ³Joo ñayivi tiahva jáyaha tuhun cáhan Ndióxi xihín ná nuú ñayivi cája na ña ná cuu cuahnu chága na cúu cuéntá Jesús xihín tuhun cáhan Ndióxi. Ta sáhan na tuhun ndeé ini ñayivi ta quiahva já jáxinu chága na ini na cán. ⁴Ta na ñehe táhvi cáhan tuhun ña coó nacatiahva na sáhnu mé cuití va na xihín tuhun sáhan Ndióxi nu ná cáhan na. Joo na tiahva jáyaha tuhun cáhan Ndióxi nuú ñayivi chindeé na na cúu cuéntá Jesús ña ná cuahnu chága na xihín ñaha cuéntá Ndióxi.

⁵Mí i cájii iní i tá ná cuu cáhan ndíhi ndó tuhun ña coó nasatiahva ndó. Joo cájii chága ini i tá ná jáyaha ndó tuhun cáhan Ndióxi xihín ndó nuú ñayivi jáchí xíní ñúhú chága ña yóho a juú ga ña ná cáhan ndó tuhun ña coó nacatiahva ndó. Vaha cája ndó ña ná cáhan ndó tuhun ña coó nacatiahva ndó tá íin in na tiahva nducú ñehe ña cúni cachi tuhun cáhan ndo nuú ñayivi já quéa ná cuu cuahnu na cúu cuéntá Jesús xihín mé tuhun cán. ⁶Xíní ñúhú candehé vaha ndó ña cáhan i xihín ndo, ñani mí i na cúu cuéntá Jesús. Coó saha toho ña cája i tá ná saa i coto nihni i ndohó ta já casáhá i cáhan i inga tuhun ña co cándaa ini ndó. Tá ná caja i já ndaja caja ndó candaa ini ndó tuhun Ndióxi. Ña ndítahan caja i quéa cáhan i xihín ndo ña najánaha Ndióxi nuú i. Ta ndítahan cáhan i ña ndichí cuéntá Ndióxi. Ta ndítahan cáhan i tuhun nasahan Ndióxi nuú i jáyaha i ña nu ndo. Ta ndítahan jánaha i ña ndaa cuéntá Ndióxi nu ndo.

⁷Sácú u in quiahva nu ndó sahá in tóyoo xihín dó jácaha. Ndaja caja ñayivi candaa ini na ndá yaa tíví yo tá co tiáhva í tíví vaha í, á tá co tiáhva í jácaha vaha í. ⁸Ta ndaja caja na soldado cacu tiahva na mé ná ña ná

cuhun na cani táhan na tá ta co tiáhva vaha da tiví trompeta tiví da do.
⁹Quiahva já yáha ri xihín mé ndó jáchi tá co cáhan ndó tuhun ña cuu candaa ini ñayivi ndaja caja ri na cán candaa ini na ña cáchi ndó. Cúu á tátuhun cáhan ndó nu táchi cuití va. ¹⁰Cája i cuéntá ín cuahá ndivaha nuú tuhun cáhan ñayivi ndijáá ñuyíví. Joo ndijáá tuhun yóho cáxi cáhan nuú ñayivi cáhan na mé tuhun yóho. ¹¹Joo tá co cándaa ini i ña cáhan inga ñayivi xihín i já cúu u tátuhun in da tóho nu mé ná. Ta na cán cacuu na tátuhun in na tóho nu mí i sahá ña co cándaa ini i tuhun cáhan na. ¹²Sahá ña cán quéa tá mé a ndaa cúni ndó ndiquehe ndó ña sahan ínima yíi Ndióxi nu ndó já quéa xíní ñúhú ndinducú ndó ña ná cuu chindeé ndó na cúu cuéntá Jesús ná cuahnu chága na xihín tuhun Ndióxi.

¹³Ña cán quéa ndá ndó ñehe táhvi cáhan ndó tuhun ña coó nacatiahva ndó já quéa xíní ñúhú caca ndó nu Ndióxi ña ná cuu ndicani ndó ña cúni cachi a nuú ñayivi. ¹⁴Jáchi tá ná casahá cáhan i tuhun ña coó nacatiahva i nani xíca tahví i nu Ndióxi já quéa mé a ndaa cája cáhnu i Ndióxi xihín ínima i joo co cája i ña xihín xíní túní i jáchi co cándaa ini i ña cáhan i. ¹⁵Ndía caja i. Ña xíní ñúhú caja i quéa caca tahví i nu Ndióxi xihín ínima i ta xihín xíní túní i. Ta quiahva já xíní ñúhú cata i xihín ínima i ta xihín xíní túní i viti. ¹⁶Candehé ndó. Ná caja í cuéntá tá ndúu ndó veñuhu ta casahá ndó cáhan ndó tuhun ña coó nacatiahva ndó nani cája cáhnu ndó Ndióxi xihín ínima ndó ta ndaja coo quíhvi in ñayivi ini veñuhu, na co cándaa cuahá ini sahá ñaha cuéntá Ndióxi. Ta xíní johó na ña cáhan ndó joo a cúu caja na ndiquiahva na ndixahvi nu Ndióxi in nuú xihín ndó jáchi co cándaa ini na tuhun cáhan ndó. ¹⁷Vatí ndató ndivaha cáhan ndó ndíquiahva ndó ndixahvi nu Ndióxi joo co chindeé a na cán ná cuahnu na xihín tuhun Ndióxi jáchi co cándaa ini na tuhun cáhan ndó. ¹⁸Ndíquiahva i ndixahvi nu Ndióxi jáchi cáhan cuahá chága i tuhun ña coó nasatiahva i a juú ga ndóhó. ¹⁹Joo nani jánahá i ndohó ini veñuhu cájii chága íní i cáhan chá cuití va i tuhun já ná cuu candaa cáxi ini ndó ña cáhan i. Jáchi ndá chuun quéa ná cáhan cuahá nahá i tuhun ña co cándaa ini ndó.

²⁰Candehé ndó ñani i, na cúu cuéntá Jesús. A cáhvi ini ndó tá quiahva cáhvi ini na valí. Xíní ñúhú cahvi ini ndó tá quiahva cáhvi ini ñayivi sa tácu ini. Vatí mé a ndaa xíní ñúhú caja ndó tá quiahva cája na valí, na co cája cuachi. ²¹Xíní ñúhú ndicuhun ini ndó ndaja cáchi ley nacahyi Moisés sanahá tá nacachi Ndióxi já: “Vatí ná chindahá i na cáhan java tuhun tóho nuú ñayivi Israel joo a cúni johó na nuú cáhan na tóho cán jáchi sáá ini na Israel”, nacachi Ndióxi. ²²Tá cáhan ndó tuhun ña coó nasatiahva ndó nani cája cáhnu ndó Ndióxi co chindeé cuahá ña yóho na cúu cuéntá Jesús cuahnu na xihín tuhun Ndióxi vatí mé a ndaa na co xíní tuhun Ndióxi catóntó na xihín ña yóho. Joo tá jáyaha ndó tuhun cáhan Ndióxi xihín ndó

nuú na cúu cuéntá Jesús já cuu cuahnu chága na xihín tūhun Ndióxi vatí co chindeé cuahá ña yóho na cámaní ndihvi íchí cuéntá Jesús. ²³Caja mé ndó cuéntá tá ná taca cuahá na cúu cuéntá Jesús ta casáhá cáhan ndo tūhun ña coó nasatiahva ndó nani cája cáhnu ndó Ndióxi ta ndaja coo quíhvi na co xíní tūhun Ndióxi nu ndúu ndó jan. Ta tá ná cuni na ña sa jíin tūhun cáhan ndihi ndó já quéa cáhan na ña cúu ndó na tachi. ²⁴Joo tá ná jáyaha tóco ndihi ndó tūhun cáhan Ndióxi nuú ñayivi ta ndaja coo quíhvi in na co xíní tūhun Ndióxi. Ta tá ná cuni johó na ña cáhan ndo já quéa tahnda ini na sahá cuachi na ta já casáhá ndícani ini na sahá ña núu cája na. ²⁵Ta já nahma na cuachi na nuú ñayivi ta já ndicava xítí na caja cáhnu na Ndióxi. Ta xihín ña yóho candaa ini na ña mé a ndaa táhyí íin Ndióxi tañu ndó.

**Tóco ndihi ña cája ndó cuéntá Ndióxi xíní ñúhú caja
ndó ña xihín toní ñúhú**

²⁶Candehé ndó, ñani i, na cúu cuéntá Jesús. Tá ná nditaca ndihi ndó caja cáhnu ndó Ndióxi ndítahan nuú java ndó cata ndó salmo ta java ndó jánaha ndó nuú ñayivi. Ta ndítahan nuú java ndó jáyaha ndó tūhun cáhan Ndióxi xihín ndó nuú ñayivi ta java ndó cáhan ndó tūhun ña coó nasatiahva ndó. Ta ndítahan nuú java ndó nducú ñehe ndó ña cúní cachi tūhun cáhan na cán. Tóco ndihi ña cája ndó xíní ñúhú chindeé a ndohó ná cuahnu chága ndó xihín tūhun Ndióxi. ²⁷Ta ndítahan nuú ivi á uní ñayivi cuití va cáhan na tūhun ña coó nasatiahva na. Joo tá in tá in na caja na ña. Ta ndítahan canduu na tiahva nducú ñehe na ña cúní cachi tūhun cáhan na jan. ²⁸Ta nu táca ndo tá coó ni in na tiahva nducú ñehe ña cúní cachi tūhun cáhan na jan já quéa vaha chága ná a cáhan na tūhun ña coó nasatiahva na. Na vaha chága quéa ná cáhan yaá na ña ná cuni johó mé ná xihín Ndióxi cuití va. ²⁹Ta quiahva já tá jáyaha na tūhun cáhan Ndióxi xihín ná nuú ñayivi ná cáhan ivi á uní na cuití va. Ta xíní ñúhú cáhan na nani ndúu tútú java ga na veñuhu sándehe na á mé a ndaa cáhan na cuéntá Ndióxi. ³⁰Cája i cuéntá nani jáyaha in na tūhun cáhan Ndióxi xihín ná nuú ñayivi ta jácáhan Ndióxi ini inga na ña ná jáyaha na tūhun cáhan Ndióxi xihín na nuú ñayivi já quéa xíní ñúhú cacao na nu cuití cán. ³¹Xihín ña yóho tá in tá in ndó cuu jáyaha ndó tūhun cáhan Ndióxi xihín ndó nuú ñayivi. Já cuu catiahva na xíní johó ña yóho ña ná ndindeé chága ini na xihín tūhun Ndióxi. ³²Na jáyaha tūhun Ndióxi nuú ñayivi xíní ñúhú cañehe na quiahva xihín ña cája na nani ndátí na jáyaha na tūhun cán. ³³Jáchí cúní Ndióxi ña ná coo vaha iní caja í tóco ndihi ñaha ta ná a jána í nuú cája í ña.

Ta cájii ini mé á tá cája vaha ndó tá quiahva cája java ga na cúu cuéntá Jesús ndúu ndijáa ga ñuu. ³⁴Nani táca ndo veñuhu co ndítahan nuú najihí cahan na jáchi co cáni a nu ná cahan na. Ta co ndítahan nu ná cacomí na cuéntá sahá na veñuhu jáchi quiahva já sáhndá ley Moisés. ³⁵Ta tá cúni na canda ini na sahá ña jánaha na veñuhu xíní ñúhú ndaca tuhún na yíi ná sahá tá cása na vehe na. Jáchi co náha vaha tá cahan in ñáñaha nani táca na veñuhu.

³⁶Xíní ñúhú ndicuhun ini ndó ña a juú ndóhó cúu na nandiquehe tuhun Ndióxi nu cuítí. Ta a juú ndóhó cuití xíní tuhun Ndióxi, vaha. ³⁷Ta ndá na cáhán ña nachutú ndaa ínima ná xihín ínima yíi Ndióxi ña ná jáyaha na tuhun cahan Ndióxi xihín ná nuú ñayivi, mé na cán ndítahan nu ná ndicuni na ña cahan i ña sáhndá Ndióxi nuú i cahan i. ³⁸Joo tá co cúni na cán cuni johó na ña cahan i cuéntá Ndióxi já quea a cúni johó ndó ña cahan na cán.

³⁹Candehé ndo, ñani i, na cúu cuéntá Jesús. Xíní ñúhú ndihi ini ndó nducú ndó ña ná jáyaha ndó tuhun cahan Ndióxi xihín ndó nuú ñayivi. Ta a cáji nuu ndó nuú na cúu cuéntá Jesús tá ñéhe táhvi ná nu Ndióxi cahan na tuhun ña coo nasatiahva na. ⁴⁰Joo tóco ndihi ña cája ndó xíní ñúhú caha ndó ña xihín toní ñúhú já ná a jána ndó nu cája ndó ña.

Ndícani Pablo sahá quiví tá nanditacu Jesús

15 Candehé ndó, ñani i, na cúu cuéntá Jesús. Viti cúni ña ná ndicuhun ini ndó tuhun vaha sahá Jesús ña najánaha i nu ndo. Mé tuhun vaha yóho sa nandiquehe vaha ndó ña ta cándeé vaha ini ndó a janda viti. ²Ta jivi saha mé tuhun vaha najánaha i nu ndo yóho cuu cacu ndaa ínima ndo tá ná caha ndó ña najánaha i nu ndo xihín ndinuhu ini ndó. Joo tá ná a cája ndó ña já quea mé a uun va quea nacandúsa ndó ña.

³Candehé ndó. Na jihna ñúhú nacaja i quea najánaha i ndohó ña nacatiahva mí i cuéntá Jesucristo, mé á naxihí ndica cruxu sahá cuachí tá quiahva cáchi tuhun Ndióxi. ⁴Ta najánaha i ndohó ña najánduxu na mé á joo tá naxinu quiví uní já nanditacu tucu a tá quiahva cáchi tuhun Ndióxi coo. ⁵Ta já nanaha mé á nu Pedro xihín nuú java ga táhan da uxu ivi naxica tuun xihín a cán. ⁶Ta tá nandihí já nanaha mé á nu yáha ga nuú uhun ciento na cúu cuéntá mé á. Ta in naxini tocó ndihi na mé á. Ta cuaha táhan na naxini ñahá cán tácu yíi va na vatí java na sa naxihí na. ⁷Ta tá nandihí já nanaha mé á nu Jacobo ta anda já nanaha mé á nu tóco ndihi na naxica tuun xihín á.

⁸Ta tá nu ndíhí já nanaha ri Jesús mé á nuú i vatí cúu u da nacacu tá sa nayaha mé tiempo tá naxica nuu Jesús ñuyiví yóho. ⁹Yehe cúu u in apóstol joo íin chága saha tóco ndihi java ga na apóstol a juú ga yehe. Ta ni coo sahá i cahan na apóstol xihín i jáchi naxica nuu i nacaja xixi i xihín na cúu

cuéntá Ndióxi jihna. ¹⁰Joo mé a ndaa cúu u in apóstol jáchi nacamáni Ndióxi yehe. Ta a juú ña uun cúu ñamani nacaja Ndióxi xihín i jáchi cuahá ga chuun cája yehe cuéntá mé á a juú ga java ga na apóstol cán. Vatí mé a ndaa co cája chúun i xihín ndée mí i. Sahá ña táhvi ini Ndióxi sahá i sahá ña cán quéa chindeé a yehe cája i chuun mé á yóho. ¹¹Joo co cája toho a á yehe á na java apóstol cán cája chúun chága. Na vaha quéa tóco ndihi nde jánaha nde sahá Jesucristo ta mé ndó sa nacandúsa ndó ña najánaha nde nu ndo.

Vaxi quivi nditacu tóco ndihi ndii

¹²Tá nacahan nde tuhun Ndióxi xihín ndo najánaha nde ndohó ña nanditacu tucu Jesucristo ta nacandúsa ndó ña. Joo viti java ndó cáchí ndo ña co ndítacu toho na sa naxihi. ¹³Joo tá cáchí ndo ña co ndítacu toho na sa naxihi cúu á tátuhun co cándúsa ndó ña nanditacu tucu Jesucristo. ¹⁴Ta tá co cándúsa ndó ña nanditacu tucu Jesucristo já quéa coó saha toho tuhun Ndióxi ña xíca nde jánaha nde nuú ñayivi. Ta xihín ña yóho mé a uun va cándeé ini ndó mé á. ¹⁵Ta tá mé a ndaa coó nanditacu Jesucristo já quéa cúu nde na cáhan ña tuhún saha Ndióxi jáchi cáchí nde xihín ndo ña mé Ndióxi najánditacu a Jesucristo. Joo tá co ndítacu toho ndii ta ndehe cáchí nde ña nanditacu Jesucristo já quéa cúu nde na tuhún. ¹⁶Jáchi tá co ndítacu ndii já quéa cúni cachi a ña coó nanditacu toho Jesucristo. ¹⁷Ta tá coó nanditacu Jesucristo já quéa coó saha toho ña cándeé ini ndó mé á ta cómi yii va cuachi cuéntá saha ndó. ¹⁸Ta xihín ña yóho cúni cachi a ña a cácu ndaa toho ínima na cúu cuéntá Jesús tá ná quivi na. ¹⁹Tá ndíyahvi ña cúu yó cuéntá Jesús nani tácu yo ñuyívi yóho cuití va já quéa ndáhví nahá nacuú.

²⁰Joo mé a ndaa nanditacu ndusa Jesucristo. Ta mé á cúu á ña nu cuítí nanditacu. Ta vaxi quiví nditacu tóco ndihi yó, na cúu cuéntá mé á. ²¹Candehé ndo. Naquihvi cuachi ñuyívi sahá ña nacaja Adán, da nasacuu taa nu cuítí ta sahá cuachi yóho nacasáhá xíhi ñayivi. Ta jivi sahá ña nacaja Jesucristo tá naxihi a ndica crúxu cuu nditacu tóco ndihi na sa naxihi. ²²Xíhi ñayivi sahá ña naquixi na chichi Adán ta cája na ña núu tá quiahva nacaja Adán sanahá. Ta viti sahá ña cúu yó cuéntá Jesucristo catacú anda ama cáa quivi sahá ña nacaja mé á. ²³Ta tá ná ndindaa nuú in in na nditacu na já nditacu na caja Ndióxi. Mé Jesucristo quéa nanditacu nu cuítí. Ta tá ná ndicó coo tucu mé á ñuyívi yóho já caja mé á ña ná nditacu tóco ndihi na cúu cuéntá mé á. ²⁴Anda já ndihi saha tóco ndihi ñaha ñuyívi yóho jáchi jándihi Jesucristo saha tóco ndihi na cómi cuéntá sahá ñayivi ñuyívi yóho. Ta ndiquiahva tóco ndihi na cúu cuéntá mé á ndáha Ndióxi, tátá a já ná cacomí a cuéntá saha ná. ²⁵Jáchi Jesucristo

quéa ndítahan nu cacomí cuéntá sahá na cúu cuéntá mé á janda quiahva ná xinu coo quiví jándihi Ndióxi saha tóco ndihi na co cúní ñahá. ²⁶Ta janda nu ndíhí jándihi mé á sahá ña ná quivi ñayivi. Ta xihín ña yóho a quiví ga ñayivi. ²⁷Jáchí mé Ndióxi nandiquiahva tóco ndihi ñaha nuú Jesucristo já ná cacomí a cuéntá sahá. Joo tá cáchí tuhun Ndióxi ña cómí Jesucristo cuéntá saha tóco ndihi ñaha, co cúní cachi a ña cómí a cuéntá saha Ndióxi viti jáchí mé Ndióxi quéa nandiquiahva tóco ndihi ñaha ndáha mé á ña ná cacomí a cuéntá sahá. ²⁸Ta tá sa cómí Jesucristo cuéntá saha tóco ndihi ñaha anda já ndiquiahva Jesucristo mé á ndáha Ndióxi ña ná cacomí a cuéntá sahá. Jáchí cúu á in túhún jini já jahyi Ndióxi ta mé Ndióxi quéa nandiquiahva tóco ndihi ñaha nuú Jesucristo. Ta Ndióxi cacuu a ña cáhnu chága nu tóco ndihi ñaha.

²⁹Ndúu java ñayivi ta cándúta ná sahá na sa naxihí já ná cacu ndaa ínima ná. Joo cáchí na co cándúsa toho na ña ndítacu ndii. Ta ndá sahá quéa cája na já tá co cándúsa na nditacu ndii. Joo xini vaha í ña nditacu ndii.

³⁰Ndá chuun quéa chícāan yo mí ndijáá ní quiví nuú tondóhó nuú cuu cahní na mí tá co cándúsa í ña nditacu tucu ndii. ³¹Candehé ndo, ñani i, na cúu cuéntá Jesús. Ndijáá ní quiví vaxi tondóhó nuú i. Ta jalóho cúní quivi i. Mé ndó cándaā vaha ini ndó ña cájii ini i sahá in nanduu ndó xihín Jesucristo, xitoho í. Sahá ña cán quéa ndítahan nu ndo candúsa ndó ña cáhan i xihín ndo. ³²Cuāhá tañu naquihvi táhan i xihín ñayivi quini ñuu Efeso. Mé na cán cúu ná tátuhun quití yúcú. Joo coo saha toho ña ndóho ini i yóho tá mé a ndaa co ndítacu toho ndii. Jáchí tá co ndítacu toho ndii já quéa cuu cohó caja í tá quiahva cáchí java ñayivi tá cáchí na já: “Cóho cuxu vaha í ta coho vaha í jáchí yó quiví itaan á iajá cúu yó.”

³³A quiahva ndó ñamaní jándahvi inga na ndohó. Xíní ñúhú ndicuhun ini ndó in tuhun ña cáchí já: “Tá catáhan í xihín ñayivi, na co cája vaha já quéa játiví na mí.” ³⁴Xíní ñúhú ndicáxí vaha ini ndó ta a cája ndó cuachi jáchí ndúu java ndó ta co xini toho ndó Ndióxi. Cáhan i ña yóho xihín ndo já ná cacahan nuu ndo sahá ña núu cája ndó.

Ndaja coo tá ná nditacu ndii

³⁵Cája i cuéntá ña ndúu java ndó ta ndícani ini ndó já cáhan ndo já: “Ndaja caja Ndióxi jánditacu a na sa naxihí. Ndá yiquí cuñu ndiquehe na caja Ndióxi.” Já ndáca tuhún java ndó ndícani ini ndó. ³⁶Joo ña ndícani ini ndó saha jan cúu á ña tóntó ndivaha. Xíní ñúhú cándehé ndo ndá quiahva yáha xihín in tata tá chíhin na ña. Mé tata yóho xini ñúhú quivi a já ná nduta utu loho nu á. ³⁷Tá xutu ñayivi, co xutu toho na in yucu. Ña xutu na cúu mé tata ta co cája toho a á cúu á trigo á inga nuú tata. ³⁸Ta mé Ndióxi

quéa cája ña ná ñehe táhvi in in a cán ndá quiahva coo a ta ndá javí cañehe in in a. ³⁹Ta a juú in javí ñehe tóco ndihi ñaha. Sa jín sa jín javí in in a. Tátuhun yiquí cuñu in dataa, sa jín ín yiquí cuñu da xihín yiquí cuñu quítí. Ta yiquí cuñu laa sa jín ín a xihín yiquí cuñu tiyacá. Sa jín nacaja Ndióxi xihín in in ña nacavaha mé á. ⁴⁰Ta quiahva já nacavaha Ndióxi ña ndúu indiví ta jín va ndáa a. Ta jín yiquí cuñu ñayivi ñuyíví yóho. Ta sa jín quiahva ndató ña ín indiví ta sa jín quiahva ndató ña ín ñuyíví. ⁴¹Jín nacaja Ndióxi ña ná yehe candii ta jín nacaja mé á ña ná yehe yoo. Ta jín nacaja mé á ña ná yehe quimi ta ín java quimi sa jín sa jín yéhe rí nuú inga rí. ⁴²Quiahva já yaha ri xihín ñayivi tá ná xinu coo quiví jánditacu Ndióxi na. Jáchí yiquí cuñu yó ña jánduxu na tixi núhu cúu á ña ndihi saha. Joo tá ná nditacu tucú já a ndíhi ga saha yo anda ama cáa quiví. ⁴³Mé yiquí cuñu í jánduxu na tixi núhu yóho cúu á tátuhun in ña núu ndivaha jáchí ndihi sahá. Joo tá ná xinu coo quiví ndicoo tucu a caja Ndióxi já cacuu a ña ndató ndivaha jáchí a ndíhi sahá. Ña jánduxu na tixi núhu cúu á ña vitá ndivaha joo ña nditacu tucu cacuu a ña ndacú vaha. ⁴⁴Jáchí tá ná jánduxu na mí tixi núhu, ña jánduxu na cúu yiquí cuñu cuéntá ñuyíví yóho. Joo tá ná nditacu tucú já ñehe yó inga yiquí cuñu, ña cúu cuéntá indiví. Jáchí tá ín yiquí cuñu cuéntá ñuyíví, ña ndíhi saha ta já ín ri yiquí cuñu cuéntá indiví, ña a cuú ndihi saha.

⁴⁵Cáchí tuhun Ndióxi ña tá nacavaha Ndióxi Adán, da nasacuu taa nu cuítí já nacaja mé á ña ná catacu da. Joo cáhnu chága Jesucristo a juú ga Adán jáchí mé á cája ña ná catacu ñayivi anda ama cáa quiví. ⁴⁶Ña jihna núhu sáhan Ndióxi nu yo cúu yiquí cuñu í, ña ndíhi yachi saha. Ta tá nu ndíhi já sáhan mé á inga yiquí cuñu nu yo cuéntá indiví ta ña cán cúu á ña co ndíhi saha. ⁴⁷Mé Adán, da nacavaha Ndióxi nu cuítí nasacuu da da nacavaha mé á xihín ñundáhyi ta cúu dá da ñuyíví yóho. Ta Jesucristo, xitoho í, cúu á inga táhan dataa joo cúu á ña naquixi chí indiví. ⁴⁸Tá in tá in ñayivi ñehe na yiquí cuñu tátuhun yiquí cuñu Adán jáchí cúu á ña nacavaha Ndióxi xihín ñundáhyi. Joo ñayivi, na ndíquiahva mé ndáha Jesucristo vaxi quiví ndiquehe na inga yiquí cuñu cuéntá indiví, ña co ndíhi saha. ⁴⁹Ta viti ín yiquí cuñu í tátuhun yiquí cuñu Adán joo vaxi quiví ndiquehé inga yiquí cuñu í cuéntá indiví ta cacuu a tátuhun yiquí cuñu Jesucristo.

⁵⁰Candehé ndo, ñani i, na cúu cuéntá Jesús. Cúni caxi tuhun i xihín ndo ña a cúu toho cuhun yiquí cuñu í yóho indiví ña ná cacomí Ndióxi cuéntá sahá jáchí mé yiquí cuñu í yóho co cúu á ña cuu catacu anda ama cáa quiví. Joo ña inga, ña quiahva mé á nu yo cán, a ndíhi toho sahá. ⁵¹Ta viti cúni caxi tuhun i nu ndo sahá in ñaha nasahiin jehé nuú ñayivi ta ña yóho quéa: A juú ndihi toho í quiví jáchí tá ná xinu coo quiví quixi tucu Jesucristo ñuyíví yóho anda javí ndijama ndihí tá quiahva ndáa í ta mé

Ndióxi quiahva inga yiquí cuñu nu yó. ⁵²Ta in náá cuití yaha ña yóho jáchi cacuu a tátuhun in ndicuaní nuu yó ta já ndahyi trompeta, mé dó ndahyi nu ndíhi cuí cán já nditacu tóco ndihi na sa naxihi ta a ndíco coo ga na quivi na. Ta mí, tá tácu yó, ña caja Ndióxi xihín yó quéa ndijama yiquí cuñu í. ⁵³Jáchi mé yiquí cuñu í ña ndíhi saha yóho a cuú toho nduu a tátuhun yiquí cuñu ña quiahva Ndióxi nu yó. Sahá ña cán quéa xíní ñúhú ndijama mé á yiquí cuñu í yóho já ná cuu cohó coo í xihín mé á anda ama cáa quivi. ⁵⁴Ta tá sa nandijama yiquí cuñu í ta nanduu a ña co ndíhi saha anda ama cáa quivi já quéa xinu coo nuú tuhun ña nacachi na profeta sanahá: “Vaxi quiví ndihi sahá ña xíhi ñayivi jáchi nacandee Jesucristo nasahnu a nuú ña xíhi na. ⁵⁵Ta xihín ña yóho cája cáhnu í mé á jáchi a quiví ga ñayivi sahá ña naquee vaha Jesucristo”, cáchi tuhun Ndióxi. ⁵⁶Tá cája ñayivi cuachi já quivi tá quivi na sahá ña cája na. Ta cúu á tátuhun tá tíin líhma na jáchi ndóho ini na sahá cuachi na. Anda sanahá ndivaha sáhdá ley Moisés ña quivi ñayivi sahá cuachi na jáchi ñéhe íní cuachi caja ña ná quivi ñayivi. ⁵⁷Joo ndixahvi Ndióxi jáchi chindee a mí ña ná cuu quee vaha í sahá ña nacaja Jesucristo, xitoho í saha yó.

⁵⁸Sahá ña cán quéa ndítahan nu ndó, ñani máni i, na cúu cuénta Jesús, coo ndacú ini ndó xihín tuhun Ndióxi. Ta co xíní ñúhú jándacoo ndó ña cándee ini ndó mé á. Ta ndítahan nu ndó ndíhi ini ndó caja chúun ndó cuénta mé á jáchi sa cándaa vaha ini ndó ña a juú ña uun cúu toho chuun cája ndó jáchi íin Jesucristo, xitoho í xihín ndó.

Tá ndítaca jiuhún ña jasá na nuú na cúu cuénta Jesús

16 Taviti cúni ndicani i nu ndó ndá quiahva ndítahan caja ndó tá jánditaca ndó jiuhún ña jasá ndó nuú na cúu cuénta Jesús ndúu ñuu Jerusalén. Xíní ñúhú caja ndó tá quiahva najánaha i nuú na cúu cuénta Jesús ndúu estado Galacia. ²Ña ndítahan caja ndó quéa: tá in in domingo xíní ñúhú tavá xóo ndó táhan jiuhún ña sácú ini ndó jasá ndó jatá ña nandiquehe ndó sahá chuun nacaja ndó. A cándati toho ndó janda quiahva ná saa i jan jáchi xíní ñúhú jánditaca cuée ndó ña. ³Ta caxi mé ndó ndá na cúni ndó cañehe jiuhún jan ñuu Jerusalén. Ta tá ná xinu coo i jan chindahá i na ña ná cuhun ñehe na jiuhún ñuu cán. Ta chindahá i in carta xihín ná ña ná quiahva na ña xihín jiuhún jan nuú na cúu cuénta Jesús ndúu mé cán. ⁴Ta tá cúni Ndióxi já cuhun ri yehe va xihín na jan anda ñuu Jerusalén.

Sácú ini Pablo cuhun da coto nihni da na cúu cuénta Jesús ndúu java ga ñuu

⁵Saa i coto nihni i ndohó cúni. Joo jihna ñúhú yaha i coto nihni i na cúu cuénta Jesús ndúu estado Macedonia. Ta anda jáví saa i ñuu Corinto jan.

⁶Ta tá cúni Ndióxi candoo nahá chá i xihin ndo. Á tá coo ta coo i níi tiempo vixi xihin ndó jan. Ta tá sa ná quee e cuhun i inga ñuu já cuu chindee ndó yehe. ⁷Co cúni toho i coto nihni númí i ndohó. Ña cúni quéa candoo tóo i coo nahá chá i xihin ndo jan tá cúni Ndióxi. ⁸Joo candoo tóo i coo i ñuu Efeso yóho janda quiahva ná yaha vicó Pentecostés. ⁹Jáchí mé a ndaa núna nuú i cája chúun i cuénta Ndióxi yóho jáchí cuahá ndivaha na ndíquehe vaha na tuhun Ndióxi vatí ndúu cuahá na co cúni yehe sahá chuun cája i yóho.

¹⁰Tá ná xinu coo Timoteo nu ndúu ndó ñuu Corinto jan, ndítahan ndiquehe vaha ndó da já ná cajii íni da coo da xihin ndo. Jáchí cája chúun da cuénta Jesucristo, xitoho í tá quiahva cája chúun yehe. ¹¹A cándají ndó da. Ña ndítahan caja ndó quéa chindee ndó da já ná coo vaha ini da quixi da nuú i. Jáchí yehe xihín java ga na cúu cuénta Jesús ndáti nde xinu coo da nu ndúu nde yóho.

¹²Ta viti cúni ndicani loho i nu ndó sahá ñaní, da naní Apolos. Mí i naxica tahví ndivaha i nu dá ña ná saa da xihín java ga na cúu cuénta Jesús coto nihni da ndohó. Joo co cúni da caja da ña viti. Cája i cuénta tá ná nuná nu dá já saa da coto nihni da ndohó.

Ndídayí Pablo na cúu cuénta Jesús ndúu ñuu Corinto

¹³Cuénta vaha coo ndó. Xíní ñúhú ndacú coo ini ndó jáchí cándeé ini ndó Jesús. A yíhví toho ndó. Canduu ndacú ndó íchí cuénta Jesús. ¹⁴Xíní ñúhú caja ndó tóco ndihi ñaha sahá ña quíhví ini ndó ñani táhan ndó.

¹⁵Candehé ndo ñani i, na cúu cuénta Jesús. Sa xíní vaha ndó sahá na vehe Estéfanos, mé na nu cuítí nandihví íchí cuénta Jesús estado Acaya. Sa nandiquiahva na mé ná chindee na na cúu cuénta Jesús. ¹⁶Ña cúni caca i nu ndo cúu ña ná cuni johó ndó ña sáhdá na cán nu ndó caja ndó. Ta xíní ñúhú caja ndó tá quiahva cúni ndihi na cán jáchí chindee na ñayivi ta cája chúun vaha na cuénta Jesús. ¹⁷Cájii ini i jáchí naxinu coo Estéfanos xihín Fortunato xihín Acaico nu íin i ta nachindee na yehe. Ta vatí a cuú quixi mé ndó nuú i ¹⁸joo na yóho sáhan na tuhun ndéé ini i xihín ñaha cuénta Ndióxi tá quiahva naja na xihín mé ndó. Mé a ndaa ndítahan nu yo caja cáhnu í na cája tátuhun na yóho.

¹⁹Na cúu cuénta Jesús ndúu estado Asia chindahá na Ndióxi coo ndó. Ta jári Aquila xihín Priscila chindahá na Ndióxi coo ndó. Ta jári na cúu cuénta Jesús táca cája cáhnu Ndióxi vehe na cán chindahá na Ndióxi coo ndó. ²⁰Tóco ndihi na cúu cuénta Jesús ndúu chóho chindahá na Ndióxi coo ndó. Ta xíní ñúhú cahan Ndióxi xihín táhan ndó ta tatí yúhu táhan ndó ta yíi caja ndó ña.

1 CORINTIOS 16

²¹Yehe cúú Pablo ta xih̃n ndáha mí i cáhyí i ña yóho nū ndó ta ch́indahá i Ndióxi coo ndó.

²²Ta ndá na cō quíhvi ini Jesucristo já ná cūhun cháhan jata ná. Cama chá ná quixi Jesucristo, xitoho í.

²³Ña cúni quéa ná caja cuaḥa Jesucristo, xitoho í ñamañi xih̃n ndo.

²⁴Quíhvi ini i tóco ndihi ndó jáchi tóco ndihí cúú yó cuéntá Jesucristo, xitoho í. Já ná coo.